

ARRÜNA PRIMER ÑACONOMOSORRTI SAN PABLO ÜMO BAMA CORINTIOS

1 ¹Arrüñü Pablo urriampae ñaquioncorrti Tuparrü iñemo. Itasurutiñü nauqui apóstol ñü ümoti Jesucristo. Auna ichepeñü anati usaruqui Sóstenes. ²Supaconomoca ümo bama icocoromati Tuparrü au manu pueblurrü Corinto. Nirraquionco tanu aume, bama ausamamecaca ümoti Tuparrü, itopiqui apicococati Jesucristo. Arrti Tuparrü rranrti nauqui urria nausüboriqui ichepe namanaiña bama urapoimia nürirrti Señor Jesucristo, naqui Señor ümoma y oemo ito. ³Apasusiu ñacunusüanacarrti Tuparrü naqui Uyaü, y taiquiana urria nabaca uiti y uitito Señor Jesucristo.

Macunusüanacarrü

⁴Nantarrai ñachampienecaca ümoti Tuparrü autacu, itopiqui arrüna ñacunusüanacarrti aume, arrüna torrio aume uiti Jesucristo. ⁵Ui arrüna napacoconauncu ümoti Cristo torrio aume uiti Tuparrü aruqui nanaiñantai apapanauncubu, nauqui apipia apanita nurria, y nauqui atusi nurria aume. ⁶Chauqui tiyebo te nurria aboi arrüna suburapoi ausucarü icütüpüti Jesucristo. ⁷Sane nauquiche torrio ito aume aruqui nanaiñantai abüriacabo uiti Espíritu Santo, nauqui apisamune isiu nirrancarrti Tuparrü, mientras aparrüperaca cümenuti Señor, arrtü cuati tato. ⁸Arrti te bacheboti aucusüubu, tapü apatacheca napacoconauncu ümoti. Sane nauqui tapü ane nomünantü aboi au nausüboriqui au manu nanenese ñana, arrtü cuati tato Señor Jesucristo. ⁹Arrti Tuparrü bien buenurrti. Chüpuerrüppü aiñoconoti año. Itasuruti año, nauqui apisuputarati naqui Äitorrti, nauqui abaca ichepeti. Tonenti naqui Señor Jesucristo.

Chichepepü ñapensacarrüma bama au Corinto

¹⁰Rracuansomocona baeta aume, bama masaruquитайqui au niirirrti Señor Jesucristo. Tapü aburatoquiyacaño. Tapü apiñacaño peese amopünanaquiapatoe. Tari chepatai napapensaca y napaquionco. ¹¹Sucanañü sane, itopiqui urapoimía isucariñü bama eanaqui nesarrti familiarrü Cloé, que arraño aburatoquiyatai aumeampatoe. ¹²Canapae aboma abarrüpecu bama iñanamaciü peese amopünanaqui. Au ñapensacarrüma namatiü: “Arrüsomü sopicococati Pablo”. Aboma bama maquiataca namatiü: “Arrüsomü sopicococati Apolos”. Y aboma bama namatiü: “Arrüsomü sopicococati Pedro”. Y maquiataca namatiü: “Arrüsomü sopicococati Cristo”. ¹³¿Taqui arrüna napaquionco chepesüroti Jesucristo? ¡No, chüpuerurrüpü achepesüti! ¿Ñacuti coiñoti autacu apü curusürrü? Napaquionco ta arrüñü isonca autacu. ¿Taqui abüriquia au nisüri? Champü te. ¹⁴Nachampiencaca ümoti Tuparrü, itopiqui champüti naqui ürio sobi abarrüpecuqui, cunauntaiñatiatai Crispo ichepeti Gayo. ¹⁵Sane nauquiche caüma champüti naqui puerurrü uraboiti que ürioti au nisüri. ¹⁶Aüboqui caüma rraquionöü, ürioma ito sobi tücañe bama eanaqui nesarrti familiarrü Estéfanos; canapae tonemantai ürioma sobi, champü manrrü. ¹⁷Arri Cristo champürrü icüpurutiñü nauqui rraunimía, sino nauqui suraboi arrüna urriampae manitacarrü. Suraboi nautaesübuca eanaqui nomünantü. Arrüñü besüratai nirranitaca, sane nauqui atusi nurria nicusüurrti y nüriacarri Cristo, naqui coiñoti apü curusürrü.

Uiti Cristo tusio nüriacarri Tuparrü y ñapanauncurrti

¹⁸Itopiqui arrüna manitacarrü icütüpü niconcorrti Cristo apü curusürrü churriampü ümo bama sürobotü au infierno. Pero arroñü bama sürobotü au napese tusio oemo ta tone nicusüurrti Tuparrü. ¹⁹Sucanañü sane, itopiqui nantü sane icu Nicororrtü:

Nanti Tuparrü: Champü yaserebiquirri iñemo ñapensacarrüma bama tarucapae ñapanauncurrüma, bama tarucu ñapensacarrüma auna icu na cürrü, chüvaleopü iñemo.

Sane nauquiche chiyasutiupü.

Más bien iquiaübuta pünanaquimía.

²⁰Aboma te bama tusio nurria ümoma, bama manunecana nüriacarri, y bama ipiacama nurria anitama. Pero arri Tuparrü nanti ümoma: “Arraño chapipiacapi, chauqui tapanitacatai”. ²¹Arri te ane ñemanauncurratoe ñapanauncurrti. Tapü arrübama macrirrtianuca ñaquioncorrüma tarucu ñapanauncurrüma, pero uirri chisuputaramatipü Tuparrü. Sane nauquiche rranrrti Tuparrü nauqui ataesübuma eanaqui nomünantü namanaiña bama oncoimía y icocotama nurarri, arrüna urriampae supanunecaca aume. Abu chüsamianapü ümo maquiataca. ²²Arrübama israelitarrü rranrrüma nauqui sopitusianca milagrorrü isucarüma. Tapü arrübama griegorrü rranrrüma onsaperioma manunecatata

icuqui nantai cürri. ²³Pero arrüsomü suburapoi isucarüma nürirrti Cristo, naqui coiñoti apü curusürri. Tone arrüna ünantü ümo bama israelitarri, y arrübama chütipü israelitarri namatü suiñemo: Arraño chauqui tapanitacatai. ²⁴Pero aboma bama tasuru uiti Tuparrü eanaqui bama israelitarri y eanaquito bama chütipü israelitarri. Suburapoi isucarüma que uiti Cristo itusiancatati nicusüurrti Tuparrü y ñapanauncurrü. ²⁵Namatü macrirrtianuca que chüvaleopü arrüna nicusüurrti Tuparrü y ñapanauncurrti, abu ta manrrü valeo itopiqui manrrü ipiacati, y manrrü puerurrti pünanaqui namanaiña.

²⁶Amasasai masaruquitaquí, taha abarrüpecu champüma nurria bama tarucapae ñapanauncurrüma y arrübama ane nüriacarrüma icuqui na cürri, ni arrübamapü auqui familiarrü tarucu nane ümoma. ²⁷Itopiqui arrti Tuparrü matacümamanauncunuti ümo bama poberrü y bama chipiacapü, nauqui acüsoma bama ipiacama nurria. Tacümamanauncunuma bama champü nüriacarrüma, nauqui acüsoma bama tarucu nüriacarrüma icu na cürri. ²⁸Tacümamanauncunuma bama chücuasürüpüma icu na cürri. Sane nauqui atacüru uiti nüriacarrüma bama cuasürü. ²⁹Sane nauquiche champüti naqui puerurrti ane nivianucurrti isucarüti Tuparrü. ³⁰Uiti apicococati Jesucristo, y uiti caüma tusio nurria oemo arrüna urriampae ñapanauncurrti Tuparrü. Torrio ito oemo mapanauncubu uiti. Uitito Jesucristo urria nusaca au narrtarri Tuparrü. Uiti pertenecebo oñü ümoti y uitito morrimiacana tato arrüba nomünantü osoi. ³¹Torriatai oemo nanaiña arrüna sane uiti Tuparrü, nauqui apasa tacana arrüna nantü sane icu Nicororrü: “Tapü aupucünuncatai ui arrüna amarrtai icu na cürri. Ta manrrü urria arrtü aupucünunca ui arrüna isamutenti Tuparrü oemo”.

Arrüna manitacarrü icütüpüti Jesús naqui coiñoti apü curusürri

2 ¹Masaruquitaquí, numo anancañü abarrüpecu aucutanu, surapoi ausucarü nurarri Tuparrü. Pero chirranitacapü aume tacana bama coiñorrtai ñanitacarrüma aübu tarucu nipiaccarrüma y ñapanauncurrüma. ²Sane niñapensaca aucutanu: Irranca suraboi ausucarü solamenterrü nürirrti Jesús, naqui coiñoti apü curusürri, champü manrrü. ³Anancañü abarrüpecu chücüsüurupü niyausüpü ui nirruca y ipiaichoconoca ito. ⁴Arrüna nirranitaca aume besüratai, champürtrü tacana bama ipiacama nurria anitama icu na cürri. Pero ta uiti Espíritu Santo, itopiqui tusio nurria arrüna nicusüurrti au nirranitaca. ⁵Sane nauquiche caüma arraño amoncatü ümo nicusüurrti Tuparrü, champürtrü amoncatü ümo ñapanauncurrüma bama mañoñüncatai y ñanitacarrümantü.

Ñapanauncurrti Tuparrü

⁶Pero supanitate arrüna ñemanauncurratöe ñapanauncurrti Tuparrü. Supanitate ümo bama chauqui tiyebo uimia nurarri Tuparrü y icocoromati. Pero arrüna mapanauncurrti champürtrü tacana ñapanauncurrüma bama mayüriabuca icu na cürri, itopiqui contoatai ñana carübo pünanaquimia

nüriacarrüma. ⁷Suburapoi arrüna omirria ñapanauncurrti Tuparrü, arrüna ananca anecanatai auqui maiübo. Tücañe chütusiopü, pero caüma suburapoi arrüna ñapensacarrti, nauqui aye osoi esati au nanentacarrti, uiti Jesucristo.

⁸Arrübama mayüriabuca icuqui na cürü chütusiopü ümoma arrüna ñapensacarrti Tuparrü. Arrtü tusiopü ümoma, chiñanamatiüpü Jesús apü curusürri, abu arrti cuati esaquiti Tuparrü, auqui nanentacarrti. ⁹Ane ito corobo sane:

Champüti ñoñünrrü arrtaiti, ni oncoitipü ni apensatipü ümo arrüna nomirria rranrti Tuparrü aitorrimiati ümo bama cuasürüti ümoma.

¹⁰Pero usucarü te itusiancatati Tuparrü arrüna ñapensacarrti. Tusio oemo uiti Espíritu Santo, naqui anati au nuyausasü, naqui nanaiña tusio ümoti. Hasta ñapensacarrti Tuparrü tusio ümoti.

¹¹Chüpuerurrüpü atusi oemo ñapensacarrti quiatarrü ñoñünrrü; cunauntaiñatiatai puerurrü atusi ümoti. Sane ito arrti Tuparrü. Champüti naqui puerurrü atusi ümoti ñapensacarrti, cunauntaiñatiatai, o sea, nesarrti Espíritu. Tonenti naqui Espíritu Santo, nausüpürri Tuparrü.

¹²Arroñü champürtrü basutiu taman espíritu icuqui nantai cürü. Ta basuquiucati Espíritu Santo auqui napese esaquiti Tuparrü. Uiti te tusio oemo nanaiña arrüna omirria ñacumanatarrti Tuparrü oemo. ¹³Tone arrüna surapoi ausucarü. Rranitaca uiti Espíritu Santo, champürtrü arrüna ñapanauncurrüma bama mañoñünca icuqui nantai cürü. Sane caüma iyebo osoi arrüba ñapensacarrti Tuparrü ui yayuracarrti Espíritu Santo.

¹⁴Tapü arrübama champüti Espíritu Santo auma chiyasutiupüma arrüna ñanunecacarrti, itopiqui pururrü sonsocorrü ümoma. Sane nauquiche chüpuerurrüpü aye uimia nurarri Tuparrü, itopiqui uitiatai Espíritu Santo puerurrü aye osoi. ¹⁵Pero arrübama anati Espíritu Santo au nausasürüma uiti Tuparrü, iyebo nurria uimia nanaiña ñapanauncurrti Tuparrü. Tapü arrübama chicocoromatiüpü, chentienderrüpüma. ¹⁶Sane nantü icu Nicororrü:

Champüti ñoñünrrü puerurrü aye uiti ñapensacarrti Tuparrü.

¿Ñacutipü naqui puerurrü aiñununecanatiti?

Pero arroñü torrio oemo na aye osoi ñapensacarrti Cristo.

Nubaserebiqui ümoti tamantai Tuparrü

3 ¹Arraño bama masaruquitaqui tücañe champüti Espíritu Santo au nabausasü. Sane nauquiche rranitaca aucutanu aume tacana ümo bama icuqui nantai cürü. Nausüboriqui ichepeti Cristo tacana masiomanca.

²Ñasamunaunca abaübu. Arrümanu nirranunecaca aume tacana nipiaürri ümoti ñaüma, naqui chipiacaiquipü aati pemacarri. Canapae caümainqui abaca sane tacana masiomanca. ³Itopiqui arrüna nausüboriqui tacana bama icuqui nantai cürü, ta pesabatai aume nüriacarri quiatarrü y aburatoquiquitai aumeampatoe. Uirri te tusio que abaca tacana bama macrirrtianuca icuqui cürrtai. Apisamute tacana niyachücoimia. ⁴Ta aboma bama abarrüpecu namati:

“Arrüñü icococati Pablo”. Pero maquiataca namatü: “Arrüsomü sopicococati Apolos”. Icuqui cürrtai arrüna napapanauncu, champürrtü uiti Espíritu Santo.

⁵¿Isanempito nacarrti aume Apolos? ¿Isanempito niyaca aume? Tiene que atusi aume isane nacarrti Apolo y isane niyaca. Arrüsomü mosorrü somü ümoti Tuparrü. Soboi apicococati Jesús. Supaserebiquia ümoti Tuparrü isiu yacüpucurrti. Cadati taman ane niyatrabacarrti ümoti Señor. ⁶Arraño tacana ñanaunrrü. Arrüñü rrancütuca. Tapü arrti Apolos basupiuuruti turrü nauqui abubaü plantamanca. Pero uiti Tuparrü ububaüiro y musunaun. ⁷Tapü amasacatü ümoti naqui mancüturu, ni ümotipü naqui basupiuuru. Amasatü ümoti Tuparrü, itopiqui uiti ububaüiro y iyebo nanaiña arrüna süro cütü. ⁸Arrti naqui uiche süro cütü y arrti naqui uiche basupiuuru turrü chepatai yaserebiquirrimia ümoti Tuparrü. Pero torrio ñana nicuarrüma uiti Tuparrü ümo cadati taman isiu arrüna yatrabacarrti. ⁹Arrüsomü tacanati ayuranterrü ümoti Tuparrü. Arraño tacana ñanaunrrü. Iñana quiatarrü machepecatarrü: Arraño tacana taman porrü, arrüna rranrrti Tuparrü nauqui urriane. ¹⁰Arrüñü tacanati naqui isamutenti manu porrü. Arrti Tuparrü ui nibuenucurrti saüibuñü, bacheboti ipiacaboñü ümo na trabacorrü. Omeno cütü sobi posürümanaca canca itümobo porrü. Maquiataca isamutema narriporrü onü manio canca omeno cütü sobi. Tapü arrübama maquiataca tari arrtaimia nurria causane natücaiqui manu narriporrü uimía. ¹¹Chauqui tütane nitümorrü, ta tonenti Cristo, naqui Señor. ¹²Arrüba ñanunecarrüma bama maquiataca tone tacana manu porrü urriante uimía onü nitümorrü. Aboma caüma bama masamunuma porrü oro o plata o arrüba canca omirriantai. Pero aboma ito bama masamunuma porrü ui arrüba chururaupü tacana sueca, borrü y baparrü. ¹³Tusio ñana arrtü urria yatrabacarrti cadati taman au manu nanenese anche bacurrtarati Tuparrü aübu pese. Ui manu pese caüma tusio arrtü ururau nubatrabacaca o champü. ¹⁴Arrtü chomopü ui pese manu porrü urriante osoi, auqui caüma torrio oemo nucua uiti Tuparrü itobo. ¹⁵Pero arrtü omo, ümonatai nubatrabacaca. Iyebo osoi esati Tuparrü, pero chütorriopü nucua uiti oemo.

¹⁶¿Aensapü tusio aume, masaruquitaquí, que arraño tacana niporrü Tuparrü, auna cauta pohosoti? Anati te Espíritu Santo au nabausasü. ¹⁷Arrti naqui uiche ñnarrio niporrü Tuparrü carrticaboti nurria uiti Tuparrü. Itopiqui niporrü Tuparrü samamecana ümoti. Arraño te tacana niporrü caüma, itopiqui anati au nabausasü.

¹⁸Tapü apatachemacaca aumeampatoe. Aboma bama abarrüpecu ñaquiuncorrüma ipiacama nurria, abu ta tacana mañonüncatai icuqui nantai cürrü. Arrüma tiene que aiñocomo manu nipiaccarrüma, nauqui aiñanamacü sonsorrüma au narrrta genterrü icu na cürrü. Sane nauqui aye uimía arrüna ñapanauncurrti Tuparrü. ¹⁹Arrüba manunecatata icuqui na cürrü manrrü omirria ümo genterrü. Pero au narrrtarrrti Tuparrü pururrü sonsocorrü. Ane te corobo sane: “Arrti Tuparrü bapacheroti niquiubuti causane nauqui mameso ñapanauncurrüma bama ipiaca icu na cürrü”. ²⁰Nantito icu Nicororrü sane: “Tusiatai ümoti Tuparrü que champü yupaserebiquirri arrüba ñapensacarrüma bama ipiaca icu na cürrü”.

²¹ Sane nauquiche tapü vanurraño aibu nürirrimia bama mañoñuncatai. Ta torrio aume nanaiña uiti Tuparrü. ²² Arrüñü ichorriquia aume. Arrti Apolos y arrti Pedro torrioma aume. Hasta enterurrü cürrü torrio aume. Urria ñaquioncorrti Tuparrü aume, caüma y ñana ito, arrtü austöboriquia y arrtü auconca ito. ²³ Pero arraño ito autorriquia ümoti Cristo, y arrti Cristo torrioti ümoti Tuparrü.

Yatrabacacarrüma bama apostolerrü

4 ¹ Masaruquитайqui, tiene que atusi aume, arrüsomü bama apostolerrü supaserebiquia ümoti Cristo. Icüpuruti somü nauqui suburaboi isucari genterü arrüba ñapensacarrti Tuparrü, arrüba amonquio umanecatai uiti tücañe. ² Arrti taman mosorrü tiene que aisamunenti nurria isiu nurarrti ipiatronetorrti, nauqui puerurrü oncotitü ümoti. ³ ¿Carü arrüñü, urria niyaserebiqui ümoti Tuparrü? Bueno, champü nümoche sobi arrtü apacurrtaca saübuñü, ni arrtü bacurrtarama maquiataca saübuñü. Ni arrüpüñü suraboi arrtü urria o churriampü niyaserebiqui. ⁴ Au nirraquionco champü nünantü sobi. Pero champürrtü uirri tusio arrtü urria niyachücoi. Arrtiatai Señor tusio ümoti. Arrti te bacurrtarati saübuñü. ⁵ Sane nauquiche tapü apacurrtaca aübuti quiatarrrü, arrtü urria o churriampü yachücoiti. Aparrüpera cheperrrtü cuati tato Señor. Uiti caüma tiene que atusi nanaiña arrüba ñapensacarrüma macrirrtianuca au nitusirrimia, arrüba amonquio umanecana. Auqui caüma ane ñanauncurrti Señor ümo cadati taman isiu arrüna niyachücoiti.

⁶ Masaruquитайqui, surapoi arrüna sane icütüpüti Apolos y isütüpüñü. Irranca nauqui aye aboi arrüna manunecatarrü: Tapü anati naqui vanurrti aübuti naqui taman, tapü ümoti quiatarrrü tüboricotiatai. ⁷ ¿Causanempü tarucu nauvanucu? ¿Napaquionco aucuasürüca manrrü pünanaquiti quiatarrrü? Abu nanaiña arrüba abe aboi torrio aume uiti Tuparrü. ¿Causane tarucu nauvanucu, tacanarrtü iyebo aboi nanaiña aboiyapatoe?

⁸ Pero arraño napaquionco chauqui tiyebo aboi nanaiña naurriantümo, chauqui tiyebo nurria aboi napapanauncu ümoti Tuparrü. Napaquionco champü isane faltabo aume, y chauqui tapacanaca suiñemo. Abaca tacana mayüriabuca au tronorrü. Urriampaepü arrtü ñemanauntu tütane nabüriaca. ¡Auqui caüma somecatü tanu nauqui ane ito sobüriaca anchepe! ⁹ Canapae arrüsomü apostolerrü iñanati somü Tuparrü au nitacürurrü, champü suisua icu na cürrü. Subaca tacana bama mañoñünca süromatü ui mayüriabuca ümo niconcorrüma y namanaiña bama macrirrtianuca asaramatü ümoma aübu nuncurrüma ümoma. Sane ito arrüsomü subaca auna icu na cürrü aübu suichaquisürücü. Asaramatü suiñemo genterü y bama ito angelerrü. ¹⁰ Arrüsomü tacana sonsorrrü somü au narra genterü auqui nacarrti Cristo. Tapü arraño abaca tacanarrtü tarucapae napapanauncu uiti Cristo. Arrüsomü chüsisusüucapü, tapü arraño tarucu naucusüu. Unuma somü, tapü aume ane ñanauncurrüma. ¹¹ Hasta caümainqui suichaquisürüca ui suisürüpü, ui suichosü y todaviarrü rrürüpütüsa somü. Ocüsioma suiñemo macrirrtianuca, y champü suipobo cauta supacansa

pario. ¹²Supatacheca ui arrüina supatrabacaca iyo sumutuburibo. Arrtü ipiaurramanama somü, sopicunusüancacama tato. Arrtü tüboricoma suiñemo, champü nümoche soboi. ¹³Manitanama churriampü suiñemo, pero arrüsomü sopiñumuta tato aübu urria supanitaca ümoma. Subaca ümoma tacana arrone sumenurrü icu na cürrü. Champü isane supaserebiqui ümoma hasta caümainqui.

¹⁴Arrüñü Pablo sucanañü arrüna sane aume, champürrtü nauqui aucüiso, ta nauqui rracuansomoco aume tacanati taman ñoñünrrü ümoti aütorrti, naqui cuasürüti nurria ümoti. ¹⁵Arrtü abomapü diez mil bama iñununecanama año, pero anati tamantiatai naqui aubaü au nürirrti Jesús, ta arrüñü. Arrüñü aubaü itopiqui sobi suraboi ausucarü arrüna urria manitacarrü, y sobi apicococati Cristo. ¹⁶Sane caüma rranquiquia amopünanaqui, nauqui apisamune isiu arrüna niranunecaca. ¹⁷Sane nauquiche icüpucati Timoteo tanu aubesa. Arrti tacanati taman isaü au nürirrti Cristo. Cuasürüti iñemo. Puerurrü rroncatü nurria ümoti. Arrti caüma urapoiti tatito ausucarü causane nisüboriqui y causane niranunecaca, tacana arrüna rranunecaca au nanaiñantai eana bama icocoromati Jesús.

¹⁸Acamanu ameanu aboma bama ñentonaunrrüma, ñaquiönorrüma chiyecapütüqui tanu yapasearaño. ¹⁹Pero irranca yero tanu conto, arrtü rranrrti Señor. Arrtü tiñatai abarrüpecu irranca yasarama manuma mañentonaunca na atusi iñemo, arrtü ñemanauncurratoe tusio nicusüurrti Tuparrü au nisüboriquirrimia, o arrtü manitanamantai. ²⁰Itopiqui arrüna nüriacarrti Tuparrü oemo tusio ui arrüna urriante uiti uyarrüpecu ui nicusüurrti, champürrtü tusio ui numanitacatai. ²¹¿Isane arrüna aurrianca arrtü tiñatai aubesa? ¿Aurrianca na besüro sobi carrticabo año? ¿O aurrianca iñanai aübu naucua iñemo y bien buenurrüñü abaübu?

Carrticurrü ümoti nauqi bavivicoti tacana numuquianrrü

5 ¹Ñoncoi que anati taman abuturuqui ane tacana nicüpostoti manu ipiacütoboti. Ni arrübamapü chisuputaramatipü Tuparrü aisamunema sane arrümanu nomünantü. ²¿Causane tarucu naupucünuncu? ¿Causanempü chapipenecatipü maniqui ñoñünrrü ameanauqui? Mejor ausuche nanaiña arraña itacu arrüna sane pasabo abarrüpecu. ³Chiyacapü acamanu abarrüpecu aübu cürrü nisütüpü, pero yaca aübu niyausüpü. Chauqui tiyacurrta aübuti maniqui ñoñünrrü, tacanarrtü yacapü acamanu abarrüpecu. ⁴Apiyoberabasaño au nürirrti Jesucristo, y arrüñü yaca ito acamanu anchepe aübu niyausüpü, y arrtito Señor Jesucristo anati acamanu aübu nanaiña nüriacarrti. ⁵Apitorrimiarrti maniqui ñoñünrrü ümoti choborese, nauqui uiti carrticabo cürrü nicütüpürrti. Rrepente au cuantionqui naneneca taesüburu nausüpürrti eanaqui nomünantü, y sane aye uiti esati Tuparrü au manu nanenese anche cuati tato Señor Jesús.

⁶Churriampü arrüna arrtü ñentonaunrrü año. Suraboira baeta ausucarü arrüna machepecatarrü, arrüna tusio nurria aume: Arrtü masamuca pan,

uiñata chimiantai levadurarrü eana tubarrirri. Ui na chimiantai levadurarrü ocoro nanaiña masarrü. Bueno, arraña tacana manu masarrü, tapü arrüna nomünantü tacana levadurarrü. ⁷Sane nauquiche apicoñoco nausüboriqui. Apiñoco nanaiña arrüna nomünantü. Sane caüma abaca tacana masarrü arrüna champü levadurarrü eana, bien usiña. Tusio te iñemo, chauqui tümorrimiacana tato arrüba nomünantü aboi, itopiqui arrti Cristo chauqui tücoiñoti autacu. Tonenti naqui tacana arrone nobirrama taborio ümo pierrta parrcu. ⁸Sane nauquiche osüborira nurria aübu urria numapensaca ñemanauncurratoe. Tapü osüboriquia eana nomünantü tacana arrüna churriampü nubachücoi tücañe.

⁹Rracüpuca aume aucutanu quiatarrü nirraconomoso. Sucanañü aume, tapü amamenca ichepe bama bavivicoma tacana numuquianca. ¹⁰Pero champürrtü rranitaca ümo bama chicocoromatipü Tuparrü, ni ümopü bama tarucu nirrancarrüma iyo monirri, ni ümopü bama macusüpüca, ni ümopü bama manaunu ümo masantuca. Itopiqui arrtü aurriancapü apaquicho ñünanama, amecatüpu icuqui na cürrü. Pero chüpuerurrüpu te sane. ¹¹Sane nauquiche suraboira caüma nurria ausucarü: Tapü abasiquia eana bama namatü sane: “Arrüñü aubaruqui au nürirrti Jesucristo”, pero bavivicoma tacana numuquianca, tarucu nirrancarrüma iyo monirri y manaunuma ümo bama masantuca, y manitanama churriampü apüti quiatarrü y cusüpürrüma. Tapü aubaca ichepe bama sane nisüboriquirrimia au nürirrti Jesucristo. ¹²⁻¹³Arrüñü champürrtü torrio iñemo nauqui rracurrtaca aübu bama chicocoromatipü Jesús. Arrti te Tuparrü bacurrtarati aübuma ñana. Pero arraña tiene que apacurrtaca aübu bama icocoromati Jesús. Sane nauquiche tapü asioti abarrüpecu maniqui churriampatai nisüboriquirrti. Apipenesorrti auquimanu ameanaquí.

Tapü aburacati usaruqui isucarü mayüriabuca

6 ¹¿Causane amenotü esa bama mayüriabuca, bama chicocoromatipü Jesús, nauqui rrimiacana tato uimia aume arrüna chürüri aübuti quiatarrü? Mejor apiñarrimiaca acamanu aboiyapatoe, itopiqui arraña apicococati Jesús. ²¿Aensapü chütusiopü aume, que arrüba icocoromati Jesús tiene que acurrtama aübu genterrü icu na cürrü ñana? Arrtü apacurrtaca ñana sane, ¿causane chapacurrtacapü caüma ito arrüba chürüri mochiomancatai? ³¿Taqui chütusiopü aume, masaruquitaiqui, bacurrtaca ñana hasta ümo bama angelerrü? ¿Causanempü nauqui chübacurrtacapü aübu nomünantü icuqui na cürrü? ⁴Pero arraña apiñacati naqui chücuasürüpu aume, nauqui acurrtati abaübu! ⁵Sucanañü arrüna sane aume nauqui aucüso. ¿Acasopü champüti acamanu abarrüpecu naqui ipiaca aiñarrimiicati tato arrüba chürüri? ⁶Churriampü arrüna arrtü tamanti abuturuqui sürotitü asamuti chürüri ümoti yaruquitorrti au nürirrti Jesús y todaviarrü sürotitü esati yacurrtacarrü naqui chicocorotitipü Cristo.

⁷Churriampü apasamu chürüri ümoti quiatarrü. Manrrü urria arrtü chebatai aboi na asamuti quiatarrü arrüna churriampü aume. Mejor tapü amocümaca autacuapatoe, arrtü anati encañao aume. ⁸Pero aboiyapatoe

apisamute arrüna churriampü ümoti quiatarrü, y apencañaca ümoti. ¡Causanempü, abu tonema aubaruquитайqui au nürirrti Jesús!

⁹Apaquionsaño iyo arrüna sane: Arrübama isamutema arrüna nomünantü, chüpuerurrüpi aye uimia esati Tuparrü, auna cauta ane nüriacarrti. Tapü amencañaca aumeampatoe. Chüpuerurrüpi aye uimia esati Tuparrü bama bavivicoma tacana numuquianca, y bama manaunuma ümo bama masantuca, y bama süromatü isiu quiatarrü paürrü, y bama ichübomacü ümomantoe, ¹⁰y bama macusüpüca y bama tarucu nirrancarrüma iyo monirri, y bama mayorisübaboca, y bama churriampü ñanitacarrüma apüti quiatarrü, y bama encañaoma.

¹¹Abarrüpecu aboma bama sane tücañe nisüboriquirrimia. Pero caüma arrti Tuparrü iquiaübutati amopünanaqui nanaiña arrüna sane nomünantü. Abaca caüma ausamamecaca ümoti. Urria nabaca au narrtarrti. Sane pasabo, itopiqui apicococati Señor Jesucristo y itopiquito cuati Espíritu Santo au nabausasü.

Uitorrimiana nocütüpü ümoti Tuparrü

¹²Amucanaño caüma: “Pero arrüsomü puerurrü sopisamune isiu suirranca”. Bien ñemanauncurratoe, pero champürrtü urria nanaiña arrüna apisamute. Puerurrü te uisamune isiu nurrianca, pero tapü tarucapae nurriaca iyo aruqui nanaiñanatai, na tapü usaca tacana mosorrü ümo na nurrianca. ¹³Ñemanauntu te nura genterrü sane: “Arrüna pemacarrrü ane ümo noquiporo, tapü arrüna noquiporo ane ümo pemacarrrü”. Pero ñana arrtü toconca champü nümoche pemacarrrü ni noquiporopü. Pero arrüna nocütüpü champürrtü nauqui bavivi tacana numuquianca, ta nauqui baserebi uirri ümoti Tuparrü, itopiqui arrti Señor ane nüriacarrti ümo nocütüpü y ümo nuyausüpü. ¹⁴Arrti Bae Tuparrü isümoniancanatiti Señor Jesús. Sane ito isümoniancanati oñü ñana ui arrüna tarucu nicusüurrti.

¹⁵Tusio te aume, que arrüba naucütüpü abe tacana taman parterrrü nicütüpürrti Cristo, o sea pertenecebo ümoti. ¿Aensapü urria caüma arrtü carübu taman parte nicütüpürrti Cristo y aüro ichepe nicütüpü taman paürrü, arrüna ane ichepe sürümana mañoñunca? ¡Abu churriampü te! Tapü pasabo arrüna sane. ¹⁶Tusio aume que arrti naqui ñoñünrrü süroti ichepe taman paürrü churriampü nisüboriquirri chauqui tacana tütaman nacarrtai nacarrüma au narrtarrti Tuparrü. Sane ito nantü icu Nicororrü: “Tamanti ñoñünrrü ichepe taman paürrü taman nacarrtai nacarrüma”. ¹⁷Sane ito arrtü uitorrimiaca oñü ümoti Señor, taman nacarrtai nusaca ichepeti.

¹⁸Sane nauquiche tapü apaviviquia tacana numuquianca. Arrüba piquiataca nomünantü champü causane oboi ümo nocütüpü. Pero arrti nauqui bavivicoti yupu paüca isamutenti nomünantü ümo na propiorrü nücutüpürrti. ¹⁹¿Chütusiopü aume que arrüna naucütüpü ane tacana niporrti Espíritu Santo? Itopiqui torrioti aume uiti Tuparrü, nauqui anati au nabausasü. Sane nauquiche caüma chüpuerurrüpi apisamune isiu naurrianca aübu naucütüpü.

²⁰Itopiqui chauqui tüpertenecebo año ümoti Tuparrü. Arrti tübapacarati chama abitobo. Sane nauquiche caüma apiñanaunsurrti aübu naucütüpü.

Macuansomocorrü ümo maponacacarrü

7 ¹Au manu taman cartarrü aboi iñemo apanquítico rropünanaquiniü. Rranunecana baeta arrüna aurrianca atusi aume icütüpü maponacacarrü. Urria ümoti taman ñoñünrrü chüposotipü. ²Pero arrübama macirrtianuca icu na cürrü tarucu nomünantü uimia. Bavivicoma tacana numuquianca. Sane nauquiche urria arrtü posoma, cadati ñoñünrrü tari ane propiorrü nicüpostoti y cada taman paürrü tari anati naqui propiorrü iquiana. Sane nauqui tapü apaviviquia tacana numuquianca. ³Arrti ñoñünrrü tiene que aisamunenti arrüna yachücoboiboti aübu nicüpostoti. Isiu ito paürrü tiene que aisamune arrüna yachücoboibo aübuti iquiana. ⁴Arrti ñoñünrrü ane nüriacarrü ümo nicütüpü nicüpostoti. Isiatäi paürrü ane nüriacarrü ümo nitütüpürrti iquiana. Champürrtü ümotiatoe nicütüpürrti, y paürrü isiatäi champürrtü ümoantoe nicütüpürrü. ⁵Apavivi aübu naucüposü tacana bama poso. Churriampü apiñanecacaño amopünanaquiatoe, cunauntaña ñome mantucubatai naneneca, nauqui puerurrü apean nurria, arrtü sane naurrianca. Pero iyau manio naneneca tiene que apavivi tatito aübu naucüposü, tapü cuatü macocotorrü aume uiti choborese, itopiqui naurrianca ñome nomünantü aneantäi.

⁶Arrüna sane nisura chütüpü yacüpucurrü Tuparrü, solamenterrü nirracuansomoco aume. ⁷Manrrü urriampü iñemo arrtü namanaiña arrañö chaupocapü tacanañü. Pero arrti Tuparrü bacheboti ümo cadati taman ñapensacabotiatoe. Sane nauquiche ane nauche chichepepü numapensaca ümo arrüna sane.

⁸Suraboirä caüma arrüna nirracuansomoco ümo bama surterurrü y ñome ba biuraca: Canapae urria arrtü apisamute tacana arrüñü: Tapü aupoca. ⁹Perorrtü chavantabopü año na chaupocapü, mejor aupoca, antes que ane nomünantü aboi.

¹⁰Suraboirä caüma isucarü bama tüposo arrüna bacüpucurrü: Taman paürrü tapü iñoconoti iquiana. Arrüna bacüpucurrü champürrtü sobiatäi, ta uiti naqui Señor. ¹¹Pero arrüna paürrü tiñoconoti iquiana, tapü poso aübuti quiatarrü, tari yeraca tato aiñarrimiaca aübuti iquiana, nauqui avivi tato ichepeti. Isiatäi naqui ñoñünrrü, tapü iñcotati nicüpostoti.

¹²Suraboirä ito ausucarü arrüna chitonempü yacüpucurrü Señor, ta niñapensacatoe. Arrtü anati taman usaruqui au nürirrti Jesús, y nicüpostoti chicocorotipü Jesús, pero rranrrü avivi aübuti, tapü iñcotati. ¹³Sane ito nirracuansomoco ñome ba paüca arrtü anati iquiana chicocorotitipü Jesús. Arrtü urria ümoti aviviti aübu, tapü iñoconoti. ¹⁴Arrti naqui ñoñünrrü chicocorotitipü Jesús, pero nicüpostoti icocoroti, tonenti naqui tüsamamecana pario ümoti Tuparrü isiuqui nicüpostoti, itopiqui tone icocoroti Jesús. Isiatäi pasabo ümo paürrü chicocorotipü Jesús. Samamecana pario ümoti Tuparrü, itopiqui arrti iquiana icocorotiti Jesús. Arrtü nampü chüsanempü, chüsamamecanapüma ito

ümoti Tuparrü bama abaübösi, aboma tacana naübosirrti naqui chicocorotitipü Jesús. Abu chüsanempü, aboma te samamecanama ito ümoti Tuparrü. ¹⁵Pero arrtü rranrti ariorrti ñoñünrrü pünanaqui nicüpostoti, naqui chicocorotitipü Jesús, tari yeracatitü. Isiatäi arrüna paürrü chicocorotipü Jesús, tari yeracatü pünanaquiti iquiana naqui icocoroti Jesús, arrtü sane nirrancarrü. Champü nüriacarrü nauqui asioma ichépemantäi arrtü sane. Itopiqui arrti Tuparrü utasuca uiti, nauqui urria nusaca icu cürü uiti. ¹⁶Itopiqui arrcü paürrü chütusiopü aemo arrtü puerurrü aitaesümunuti aiqüianü eanaqui nomünantü ñana. Y arrcü ñoñünrrü chütusiopito aemo arrtü puerurrü aitaesümunu nacüposü eanaqui nomünantü ñana.

Apaserebi ümoti Tuparrü

¹⁷Nanaiña arraña tiene que apavivi icu na cürü tacana arrüna nabaca tücañe, nauquiche itasuruti año. Sane nirracüpucu ümo namanaiña bama icocoromati Jesús au nanaiñantäi. ¹⁸Arrti naqui circuncidaboti tücañe numo aübo aicocorotiti Jesús, tari asioti sane aübu circuncisión. Arrti naqui chücircuncidabotipü numo aübo aicocoroti Jesús, tapü circuncidaboti. ¹⁹Champü nümoche uiti Tuparrü arrtü circuncidabo oñü, o champü. Arrüna nirrantiümoti es uicoco yacüpurrti. ²⁰Cadati taman, tari süsioti tacana nacarrti tücañe numo maübo tasuruti uiti Tuparrü, nauqui aicocorotiti Jesús. ²¹Arrtü mosorrücü tücañe numo aübo aitasurutiü Tuparrü, tapü ane penarrü obi. Pero arrtü ane mataesmunucurrü aemo, tari aprobechabocü. ²²Arrti naqui mosorrü numo tasuruti uiti Tuparrü, tusio ümoti caüma tütaesüburuti eanaqui nomünantü, itopiqui icocorotiti Jesús. Tapü arrti naqui ñoñünrrü chümosorrtipü tücañe numo aübo tasuruti uiti Tuparrü, tonenti caüma imostorrti Cristo. ²³Arrti Tuparrü chauqui tübapacarati abitobo. Sane nauquiche tapü apaserebiquia ümo mañoñüncatai.

²⁴Sane te masaruquитайi, abasiquia aübo arrüna napatrabacaca arrüna torrio aume uiti Tuparrü, arrüna numo aübo aitasuruti año.

Arrübama sorterurrü y arrüba biuraca

²⁵Caüma tocabo rranita baeta ümo bama chüposopü. Champü yacüpurrti Señor aume, nauqui suraboipü ausucariü. Pero suraboira arrüna niñapensacatoe. Arraña tusio te aume, ta puerurrü amoncatü iñemo, itopiqui arrti Tuparrü bacheboti rrapanancubü ui nibuenucurrü iñemo. ²⁶Sane nirraqüonco: Urria arrtü chaupocapü itopiqui cuantionqui taquisürücica icu na cürü au ba naneneca. ²⁷Arrti naqui tüposo, tapü iñocotati nicüpostoti. Tapü arraña bama surterurrü, tapü apapacheca aucüposübo. ²⁸Perorrtü aupoca, champü nomünantü aboi, ta urria. Isiatäi cupiquirri champü nomünantü uirri arrtü poso. Pero arrübama tüposo taquisürüma nantarrü icu na cürü y arrüñü chirrancapü na autaqisürü, irranca te nauqui urriantäi nabaca.

²⁹Suraboira ausucariü arrüna sane, masaruquитайi: Chabaeturriquipü arrüna tiemporrü y arrüna nosüboriqui icu na cürü. Sane nauquiche

tapü ane tarucu penarrü aboi ümo arrüba ausüratai icuqui nantai cürü. Arrübama poso tiene que aña nãisüboriquirrimia tacanarrtü chüposopüma. ³⁰Arrübama suchebo tapü toneantai ñapensacarrüma. Isiatai bama pucünunña. Tapü tarucapae napapensaca iyo amenarribo y arrüna apacompratio. Apiña tacanarrtü chaboipü. ³¹Artrü urria nabaca icu na cür, apiña tacanarrtü champü isane aume ui napaquionco iyoti Tuparrü. Itopiqui arrüna cürü aübu nanaiña arrüba abe icu tien que añaarri contoatai.

³²Irranca te nauqui urria nabaca, tapü tarucapae penarrü aboi. Artri naqui sorterurrü bapacheroti niquiubuti causane, nauqui urria niyaserebiquirri ümoti Tuparrü. Rranrrti aisamunenti arrüna urria ümoti Tuparrü. ³³Pero artri naqui tüposo mapensarati ñome arrüba ausüratai icuqui nantai cürü. Rranrrti aisamunenti arrüna urria ümo nicüpostoti. ³⁴Sane nauquichea abe torrü nirrancartri. Isiatai arrüba paüca chüboposopi papachero niyuquibü, causane nauqui urria niyupaserebiquirri ümoti Tuparrü aübu nanaiña niyucütüpürrü y aübu nanaiña niñupapensacarrü. Tapü arrüba tüboposo chauqui papensara iyo arrüna ausüratai icuqui nantai cürü, itopiqui murrianrrü apisamune arrüna urria ümo bama ñopiquiana.

³⁵Sucanañü aume arrüna sane, nauqui manrrü urria napapensaca, y nauqui manrrü urria nausüboriqui y manrrü urria napaserebiqui ümoti Señor. Champürrtü racüpucatai aume.

³⁶Supiarrtü anati naqui tücomprometeboti aübu taman cupiquirri icüpostoboti, y ñaquioncorrti churriampü uiti ümo, artrü chüposotipü aübu, y ane ito tarucu nirrancartri ümo. Auqui caüma urria apoti aübu. Champü nomünantü uiti. ³⁷Pero artri naqui chauqui tümapensarati nurria, y ipiacati frenaboti arrüna tarucu nirrancartri ümo manu cupiquirri, artri caüma chüposotipü aübu. Queraboti saneantai surterurrü. Artri urria ito niyachücoiti. ³⁸Así que sucanañü ame sane: Artri naqui posoti, urria yachücoiti. Artri naqui chüposotipü, manrrü urria yachücoiti.

³⁹Arrüna paürrü tüposo ane iquiana nüriacartri iquiana ümo artrü süboricotiqui. Pero artrü tücoiñoti, puerurrü apo tatito, pero tari aübuti naqui icocorotiti Señor. ⁴⁰Pero canapae manrrü urria nacarrü artrü chüposopü tato. Tone arrüna niñapensaca. Pero apaquionsaño que arrüñü ito anati Espíritu Santo au niyausasü, uiti rranunecaca.

¿Urria umane nañese arrüna torrio ümo masantuca?

8 ¹Caüma rranunecaca ito ümo arrüna nañese tücumanana ümo bama masantuca. Ñemanauntu arroñü tusio nurria oemo ümo arrüna sane, pero aboma bama vanurrü ui arrüna tusio pario ümoma. Tapü arrüna nucua oemoantoe, tone arrüna uiche puerurrü urria nosüboriqui. ²Artri naqui tacanarrtü tusio ümoti, tonenti naqui chütusiopü nurria ümoti. ³Pero artrü cuasürüti Tuparrü oemo, artri caüma isuputarati oñü nurria.

⁴Suraboira caüma causane osoi aübu nañese arrüna samamecana ümo masantuca. Tusio te oemo anati tamantiatai Tuparrü. Arrümanuma masantuca chütonempüma tuparrüma. ⁵Arrübama macrirrtianuca namatü que aboma sürümana matupaca taha au napese y auna ito icu na cürri. ⁶Pero arraño tusio nurria aume, ta anati tamantiatai Tuparrü, naqui Uyai. Uiti urriante nanaiña arrüba abe, basaquio icu na cürri. Osüboriquia ümoti. Anatito tamantiatai Señor, naqui Jesucristo. Utitto urriante nanaiña arrüba abe. Tonentito naqui bacheboti osüboriquibo.

⁷Pero aboma bama uyarrüpecu chütusiopü ümoma arrüna sane. Arrüma iñuñetema tücañe ñanauncurrüma ümo bama masantuca. Arrtü basoma arrüna nañese tümucumanana ümo masantuca, ñaquioncorrüma chauqui tümanaunuma ümoma uirri. Sane nauquiche basoma aübu ñapensacarrüma chümarrtacarrüpatai.

⁸Champü nümoche uiti Tuparrü arrüna umate. Yasuriuruti oñü arrtü umate manu nañese. Yasuriuruti oñü arrtü chumatepü. ⁹Amasai nurria aübu arrüna urria nabaca, tapü bacheboti aboi naqui aübapae arrianti nurria aicocorotiti Tuparrü. ¹⁰Supiarrtü arrücü tusio nurria aemo, champü nairrucu. Aecatü au taman porrü nesa taman santurrü. Atümoca y aca pemacarrü. Auqui cuati tamanti naqui aübo aicocorotiti Jesús, naqui birrubutiatai. Asaratitü aemo taha. Auqui rranrrtito aati achepecü, abu au ñaquioncorrti ta churriampü. ¹¹Arrücü te tusio aemo, pero caüma asiugüicü arrti naqui quiatarrü aruqui mameso ñacoconauncurrti ümoti Tuparrü, abu itacutito coiñoti Cristo. ¹²Arrtü apisamute sane, ane napipüinate aübuti Cristo y aübuti aubaruqui, itopiqui mameso aboi ñacoconauncurrti ümoti Tuparrü. ¹³Arrtü sane ane macocotorrü ümoti saruqui ui arrüna irraca nañese isucarüti, mejor tapü irraca, tapü penecoti au nomünantü auqui niyaca.

Nüriacarrti naqui apóstol

9 ¹Chiyaserebiquiapü ümo mañuñüncatai. Yaserebiquia ümoti Tuparrü tacana nesarrti coreorrü. Yasacati tücañe Jesús, naqui Señor. Arraño nirracanasa año ui arrüna niyaserebiqui ümoti Señor. ²Aboma bama namatü que arrüñü chütüpü apóstol ümoma. Pero aume ñemanauncurratöe apóstol ñü, itopiqui sobi apicococati Jesús. Aboi te tusio que apóstol ñü.

³Rranitana baeta ichacuñüantoe isucarü bama unumañü y churriampü nurarrüma iñemo. ⁴Ane nisüriaca nauquipü yasuriupü arrüna itorrimiatama iñemo, nauqui irra y icha. ⁵Puerurrütaipü ipo aübu taman paürrü arrüna icocoroti Jesús, nauqui iquiapü isiuñü au viajerrü, tacana arrüna isamutema bama maquiataca apostolerrü y bama yaruquitorrti Señor, y arrti Pedro. ⁶Tapü arrti Bernabé y arrüñü supatrabacaca iyo arrüna sumutuburibo. Arrübama maquiataca torriatai ümoma. ¿Causanempü sane? ⁷Ñacutipü sortaborrü bahiyoti y chütorriopü ümoti monirri itobo? ¿Ñacutipü naqui ñuñünrrü mancüturuti uva

au niyorrti, y chübasotipü uva, arrtü tubupubo? ¿Ñacutipü ñoñünrrü bacuirarati yutacu nobirraca, y chüchabotipü nipiäürrü? ⁸Arrüna nisura sane champürrtü ñapensacarrüma mañoñüncatai, ta nantito sane nüriacarrü, arrüna torrio uiti Tuparrü. ⁹Ane te corobo sane: “Tapü aiñata bosal ümo buyese na tapü baso arrtü batrabacara aemo”. ¿Aensapü ane tarucu penarrü uiti Tuparrü yutacu buyeca? No, champü. ¹⁰Arrüna sane nurarri Tuparrü ta tone machepecarrü oemo. Arrti naqui masamunuti ñanaunrrü barrüperarati nauqui aye ñana ümoti arrüna naurri manu ñanaunrrü. Isitai arrti naqui batubarrioti au tacurri tiene que aye uiti tubarrirri. ¹¹Sane ito arrüsomü suburapoi ausucarü nurarri Tuparrü. Tone arrüna sane supachücoi abarrüpecu, tacanarrtü supanca cütu. ¿Causanempü caüma nauqui chütorriopü suiñemo pario sumutuburibo? ¹²Aboma bama maquiataca manquiomantai amopünanaqui naumoni y namenarri. Abu arrüsomü manrrü ane suisüriaca nauqui supanqui amopünanaqui, nauqui apayura suiñemo. Pero arrüsomü chüsupanquiquiapü. Supapacaca itobo nanaiña arrüna sumate, nauqui tapü aboma bama churriampü ñanitacarrüma suiñemo itopiqui arrüna urria manitacarrü icütüpüti Jesucristo, arrüna suburapoi.

¹³Tusio te aume, arrümanuma batrabacara au niporrti Tuparrü torrio ümoma nauqui aama arrümanu ñañese mucumanana ümoti Tuparrü. ¹⁴Sane ito arrüsomü. Bacüpuruti Señor nauqui atorri bapacatarrü ümo bama urapoimia arrüna urria manitacarrü icütüpüti Jesús, uiche puerurrü asüborimia. ¹⁵Pero arrüñü nuncapü rranquiquia amopünanaqui, abu ane nisüriaca. Chirraconomocapü arrüna sane nauqui apache iñemo ñana. No, manrrü urria iñemo, arrtüpü isonca ui nisürüpü. Itopiqui arrüna sane nirratrabaca tone ipucünuncubu.

¹⁶Sane nauquiche surapoi arrüna nurarri Tuparrü, champürrtü aübu tarucapae vanucurri. Surapoi itopiqui tone nirratrabacaca. Itopiqui poberrüñüantai uiti Tuparrü arrtü chüsurapoi. ¹⁷Arrtü nampü surapoi arrüna manitacarrü ui niñoñemantai, puerurrüpü apacama iñemo itobo nirratrabacaca. ¹⁸¿Causanempü caüma nauqui ane ñana nisua uiti Tuparrü? Ane nisua ñana itopiqui chirracobracapü itobo arrüna surapoi nurarri Tuparrü, arrüna urria manitacarrü, abu puerurrüpatai rracobüra, arrtü irrancapü.

¹⁹Arrüñü champürrtü mosorrüñü ümoti quiatarrü ñoñünrrü. Pero ta mosorrüñü uiti Tuparrü ümo namanaiña macirrtianuca nauqui aicocoromati Cristo. ²⁰Arrtü yaca eana bama israelitarrü iñata nisüboriqui tacana israelitarrü, nauqui aicocoromati Jesús sobi. Arrüñü champürrtü ñoncatü ümo manu nüriacarrü uiti Moisés, pero arrtü yaca eana bama icocotama manu nüriacarrü, icocota ito, nauqui aicocoromati Cristo sobi. ²¹Arrtü yaca eana bama chisuputacai. Nüriacarrü, isamucañü tacana arrüma. Sane nauqui arrüma ito icocoromati Cristo. Abu arrüñü icocotatai nüriacarrü, arrüna torrio uiti Tuparrü, itopiqui icocota nüriacarrü Cristo. ²²Arrtü yaca ichepe bama birrubatai aicocoromati Jesús, arrüñü isamucañü tacana arrüma, ñasamunaunca aübuma, sane nauqui aicocoromati nurria Jesús sobi. Sane sobi, isamucañü tacana aruqui namanaiña macirrtianuca, nauqui

ataesübuma sobi eanaqui nomüinantü. ²³Isamute sane nauqui atusi tanu arrüna urria manitacarrü, y nauqui aye ito sobi ñacunusüancacarrti Tuparrü.

²⁴Suraboira ausucarü arrüna machepecatarrü, tusio nurria aume. Arrtü bapurrtarama ümo barucurrü, ichépe süromatü yarucurüma, pero tamantiatai uturuquimia macananati y torrio ümoti ñacanasarrti. Sane nauquiche apiña nurria nausüboriqui, nauqui apacana uiti Tuparrü. ²⁵Arrübama cupiusu aboma bapurrtarama, pero itacumantoe, manunecanama ümomantoe, na aipiama nurria, y nauqui acüsüma nurria. Sane isamutema, nauqui aye uimia itarusüboma nasüsüca, pero arrüna chururaupü, contoatai mameso. Pero arroñü macanate ñana utarusübo arrüna chümamesopü. ²⁶Arrüñü yaca tacana bama bapurrtara, pero yarrtai nurria nauqui ipiacüñoñü nurria. Champürrtü rrahiquiatai ümonatai. ²⁷Champürrtü yacatai. Nisütüpü iñununecata ümo arrüna urria, nauqui aisamune isiu nirranca. Itopiqui churriampü iñununecanama maquiataca na aisamunema isiu nirrancarrti Tuparrü, tapü arrüñüpü chipiacapü isamunempü.

Tapü uisamute tacana bama israelitarrü tücañe

10 ¹Irranca nauqui atusi nurria aume, bama masaruquитайqui, isane pasabo ümo bama antiburrü uyaütaiqui israelitarrü tücañe. Namanaiña aboma iquiana manu cüsaüborrü, arrüna cusürübo aübuma uiti Tuparrü. Y namanaiña tompücana uimia manu narubaitu turrü nürirri “Cüturiqui”. Acü amencoma, nauqui aítompücama, pero chüpansopüma. ²Ui arrüna sane aboma tacanarrtü ürioma au nürirrti Moisés. ³Namanaiña ito basoma pan arrümanu cuatü auqui napese uiti Tuparrü. ⁴Chaboma ito arrümanu turrü torrio ümoma uiti Tuparrü. Arrümanu turrü cuatü auqui manu canrrü. Machepecatarrü arrüna sane, itopiqui arrümanu canrrü, tonenti Cristo. Tonenti naqui anati ichepema eana manu narubaitu rroense pururrü canca y cüosorrü. ⁵Sane te, pero tüsaipü namanaiña chümacoconaurrüpü ümoti Tuparrü. Sane nauquiche coiñoma au manu rroense.

⁶Nanaiña arrüna sane pasabo ümoma tacana macuansomococorrü oemo, tapü uisamute isiu nisüboriquirrimia tücañe. Itopiqui arrüma tarucu nirrancarrüma ñoma ba chomirriampü. ⁷Sane nauquiche tapü apiñanauncama manuma masantuca. Itopiqui eana bama isaelitarrü aboma bama isamutema sane tücañe. Ane te corobo sane icütüpüma: “Arrübama macrirrtianuca tümonsoma nauqui aama y nauqui achama. Auqui atüraimiam nauqui asamuma pierrta aübu tococorrü”. ⁸Tapü apaviviquia tacana numuquianca, tacana arrüna isamutema tücañe. Uirri cuatü carrticurrü ümoma. Taqui veintitres mil nubiqui bama coiñoma au manu taman nanenese ui carrticurrü. ⁹Tapü apiñata macocotorrü ümoti Tuparrü, tacana isamutema bama israelitarrü tücañe. Arrüma coiñoma ui noirroboca. ¹⁰Tapü apanitaca churriampü ümoti Tuparrü tacana arrübama tüboricoma ümoti tücañe. Itopiqui cuati taman ángel yacüpucurrti Tuparrü, nauqui atabaiti ümoma.

¹¹Nanaiña arrüna sane pasobo ümoma tacana manunecatarrü oemo. Corobo nanaiña tacana macuansomococorrü oemo bama osüoboriquia arrüna tiemporrü caüma, anche cocono nanaiña nurarrti Tuparrü. ¹²Sane nauquiche amasasai nurria. Arrti naqui onquisiote que chauqui turria ñacoconauncurrü ümoti Tuparrü, tari yacuirarati nurria itacutiatoe, tapü ñoconotiti Tuparrü. ¹³Arrüba macocotoca cuantio aume, isiatai tacana arrüba cuantio ümo bama maquiataca macirrrianuca icu na cürrü, champürrtü tarucapae. Puerurrü te amoncatü ümoti Tuparrü, itopiqui chichebopü uiti nauqui ayetü tarucapae macocotorrü aume, arrüna chüpuerurrüpü avantabo año. Arrtü ane macocotorrü aume, bayurarati aume, nauqui puerurrü apasamu tairri ümo.

¹⁴Sane masaruquitaquí, bama cuasürü ñemo, tapü amecatü ümo manio pierrtaca arrüba anche manaunuma ümo masantuca. ¹⁵Arraño apipiaca amonsape. Apapensa baeta ümo arrüna sucanañü aume. ¹⁶Nantarrai ubaca ichépe oñü aübu numachampienca ümoti Tuparrü. Uchaca vinorrü auqui manu taman coparrü. Machampienca ümoti Tuparrü itobo. Ui arrüna sane cuatü oemo nigraciarrü Tuparrü, itopiqui tone notorrti Jesucristo. Ubaca manu pan. Tone nicütüppürrü Cristo. ¹⁷Sürümanañoñü ubaca manu tamantai pan. Uirri caüma tusio tacana tamantai nocütüpi, taman nacarrü nusaca.

¹⁸Apaquionsaño iyo arrüna niyachücoimia bama israelitarri. Macumananama numuquianca icu altar ümoti Tuparrü. Auqui basoma numañeturri. Ui arrüna sane aboma nurria ichepeti Tuparrü. ¹⁹Ui arrüna sane nisura champürrtü sucanañü que arrübama masantuca manrrü valeoma o süboricoma ni sucanañüpü que abe yupaserebiquirri arrüba macumanataca ümoma. ²⁰Tone arrüna sucanañü: Arrübama macumananama ümoma, macumananama ñemanauncurratöe ümo bama machoboreca, champürrtü ümoti Tuparrü. Pero chirrancañü nauqui abaca ichepe bama machoboreca. ²¹Itopiqui chüpuerurrüpü aucha y auba au nimensarri choborese y auquimanu amenotito aucha y auba au nimensarri Señor. ²²Tapü aurrianca apapurta aübuti Tuparrü. ¿Aensapü ane manrrü naucusüu pünanaquiti?

Masamunauna aübuti usaruqui

²³Suraboira tatito ausucarü: Puerurrü uisamune isiu nurrianca. Pero champürrtü nanaiña urria arrüna urrianca. Puerurrü te uisamune isiu nurrianca, pero ane ito nurrianca ümo arrüna churriampü. ²⁴Tapü apapensaca aumeampatöe. Apapesa itacu arrüna urria ümoti quiatarri.

²⁵Puerurrü aumane nanaiña ñañese arrüna ane paventeobo. Tapü ane penarrü aboi, tapü abasiquia apanquiriu arrtü tucumanana manu numuquianrrü ümo taman santurrü. ²⁶Ane te corobo sane: “Arrüna cürrü aübu nanaiña arrüba abe icu ta ane mecuti Señor”.

²⁷Supiarrtü anati naqui chicocorotitipü Señor, y itasuruti año au niporrti nauqui auba uiti. Amecatü au niporrti. Auba caüma nanaiña arrüna nipemacarri.

Tapü ane penarrü aboi, tapü apanquiti pünanaquiti isane naca manu pemacarrü, arrtü tücumanana, o champü. ²⁸Tapürrtü anati naqui macuansomoconoti aume, nanti sane: “Arrüna nañese chauqui tücumanana ümoti taman santurrü”, auqui caüma tapü aubaca, itopiquiti naqui turapoiti ausucari. Arrti caüma mapensarati que apisamute nomünantü, arrtü aumate. ²⁹Arrümanu nomünantü champürrtü ñemanauncurratoe. Ane au ñapensacarrtiatai. Pero arroñü ane te nosüriaca nauqui uisamune isiu numapensaca; champü nümoche uisamune isiu ñapensacarrti quiatarrü. ³⁰Arrüñü irraca aruqui nanaiña pemacarrü aübu niñachampienacaca ümoti Tuparrü. Sane nauquiche champüti naqui puerurrü uraboiti que ane nipünate uirri, itopiqui ñachampienacaca ümoti Tuparrü itacu.

³¹Sucanañü caüma sane: Arrtü aubaca y arrtü auchaca, o arrtü ane quiatarrü napachücoi, apisamuse sane nauqui ane manauncurrü ümoti Tuparrü. ³²Tapü apisamute arrüna ünantü ümo bama israelitarrü, ni ümopü bama griegorrü, ni ümopü bama ito pertenecebo ümoti Tuparrü. ³³Sane ito sobi. Yapacheca niquiubuñü causane nauqui urria niyachücoi ümo namanaiña. Champürrtü ñapensaca ichacuñüantoe, ta itacu bama ito maquiataca, sane nauqui ataesübuma enaquí nomünantü.

11 ¹Apisamuse tacana arrüna niyachücoi. Itopiqui arrüñü ito isamute tacana niyachücoiti Cristo tücañe.

Arrüba paüca au reunión

²Ipucünuncatai aucuata, masaruquitaquí, itopiqui nantarrtai apaquioncaño iyoñü y apisamute isiu arrüba nirranunecaca aume. ³Pero caüma ane quiatarrü surapoboiboñü ausucari: Arrti Cristo ane nüriacarrti ümo bama mañoñünca. Arrübama mañoñünca ane nüriacarrüma ñome ba nicüpostorrüma. Y arrti Tuparrü ane nüriacarrti ümoti Cristo. ⁴Sane nauquiche surapoi ausucari arrüna sane: Arrti naqui meaboti ümoti Tuparrü, o manitanati uiti Espíritu Santo, y ane taburrio nitanurrti, champü ñanauncurrü ümoti Tuparrü. ⁵Tapü arrüba paüca tiene que autaburri, arrtü mupeabo o arrtü panitana uiti Espíritu Santo. Arrtü chütaburriopü niñutanurrtü, champü ñupanauncurrü ümo bama ñopiquiano. Abe tacanarrtü butapaquio. ⁶Arrüna paürrü chirranrripü aitamurriquia nitanurrtü, tari tapaquia. Itopiqui arrüba paüca bocüsobo, arrtü botüsüro niqui niñutanurrtü, o arrtü butapaquio. Sane nauquiche tari butaburrio niñutanurrtü.

⁷Tapü arrti ñoñünrrü tapü itamurriancatati nitanurrti, itopiqui arrti urriancati isiu tacana nacarrti Tuparrü. Uiti ñoñünrrü tusio nüriacarrti Tuparrü. Pero ui paürrü tusio nüriacarrti ñoñünrrü. ⁸Ta arrti Tuparrü chisamunutipü ñoñünrrü apüqui paürrü. Más bien isamutenti paürrü apüqui nañeturrti ñoñünrrü.

⁹Arrüna paürrü urriante itopiquiti ñoñünrrü, churriancatipü ñoñünrrü itopiqui paürrü. ¹⁰Sane nauquiche arrüba paüca tiene que apitamurriquia niñutanurrtü, na atusi que abe iquiana nüriacarrü y itopiquito asaraimia arrübama angelerrü. ¹¹Arrti Señor isamunuti oñü sane. Sane nauquiche arrti ñoñünrrü necesitaboti iyo paürrü. Isiatai paürrü necesitabo iyoti ñoñünrrü. ¹²Ñemanauncurratoe

arrüna paürrü urriante apüqui nicütüpürrti ñoñünrrü tücañe. Tapü caüma arrti ñoñünrrü anati icu cürrü auqui paürrü. Nanaiña arrüna sane cuatü uiti Tuparrü, itopiqui uiti urriante nanaiña.

¹³Apapensa baeta ümo arrüna sane: ¿Aensapü urria arrtü meabo paürrü, y chütäburriopü nitanurrü? ¹⁴Tusiatai te icu na cürrü onquisiote nurria nicüsorrti naqui ñoñünrrü abaesa niqui nitanurrti. ¹⁵Tapü ümo paürrü urria ümo abaesa niqui nitanurrü y pucünüñantai uirri. Torrio te ümo abaesa niqui nitanurrü, nauqui ataburri nitanurrü uirri. ¹⁶Arrtü aboma bama rranrrüma uratoquimia ümo arrüna sane, tiene que atusi ümoma que arrüsomü ichepe namanaiña bama maquiataca icocoromati Jesús chüsopisuputacaipü quiatarrü manunecatarrü.

Causane nauqui urria nubaca pan aübu numaquionco iyoti Señor

¹⁷Caüma rranitaca aume icütüpü arrüna napachücoi, arrüna champürrtü urria. Canapae arrtü apiyoberabacaño chütüpü ümo urria nausüboriqui, ta ümo arrüna churriampü naburatoquiquitai aumeampatoe. ¹⁸Ñoncoi te que chichepepü napanensaca, apiñacaño peese amopünanaquiatoe. Canapae ñëmanauntu pario arrüna ñoncoi. ¹⁹Ñëmanauntu te, ui arrüna chichepepü napapensaca tusio nurria ñacusanema bama ñëmanauncurratoe icocoromati Tuparrü taha abarrüpecu.

²⁰Arraño apiyoberabacaño nauqui auba ichépe año. Pero champürrtü tonenqui arrüna aubaca aübu napaquionco iyo niconcorrti Señor. ²¹Ñoncoi te que cadati taman basotiatai nipemacarrti. Chaparrüperacapü ümoti quiatarrü, nauqui ichépe auba. Sane nauquiche aboma bama cürüpüo, y bama maquiataca ane chama ümoma, y aboma bama orisübaboma. ²²Arraño anete naupo iquianache auba y aucha. Pero ui arrüna sane napachücoi apuncama bama icocoromati Jesús. Apicünsomococama bama champü isane ümoma. ¿Isanempü arrüna surapoboiboñü ausucarü ui arrüna sane? ¿Aensapü urria iñemo arrüna sane napachücoi? No, champürrtü urria iñemo.

²³Torrio iñemo arrüna manunecatarrü uiti Señor. Chauqui tüsurapoi ausucarü. Suraboira tatito: Arrümanu tücañe tobirri, numo paventeoti Jesús, tümonsoti esa mensarrü. Iñentati pan. ²⁴Machampiencanati ümoti Tuparrü itobo. Ichepesünatati y nanti ümo bama ñanunecasarrti: “Tone arrüna nisütüpü, aumase, itopiqui tiene que ison autacu. Apisamuse arrüna sane nauqui apaquionaño iyoñü”. ²⁵Chauqui niyacarrüma isamutenti isiatai aübu manu taman coparrü ataso ui vinorrü. Iñentati, nanti ümoma: “Arrüna au na coparrü, tone niñoto uiche atusi caüma arrüna nuevurrü tratorrü uiti Tuparrü abaübu. Aucha nantarrü aübu napaquionco iyoñü”.

²⁶Apisamuse sane cheperrtü cuati tato Jesús icu na cürrü, auba y aucha sane. Itopiqui uirri apitusiancata isucarü namanaiña que arrti Cristo tücañe coiñoti apü curusürrü. ²⁷Sane nauquiche arrti naqui basotiatai manu pan y chabotiatai manu vinorrü y champü ñanauncurrti ümoti Jesús, tonenti naqui ane nipünatenti aübu nicütüpürrti Señor y aübu notorrti. ²⁸Sane nauquiche



(1 Co. 11.26)

amasasai nurria, arrtü ñëmanauncurratoe apiñanauncati Señor Jesús. Auqui caüma puerurrü auba y aucha. ²⁹Itopiqui arrti naqui champü ñanauncurrti ümoti Jesús, arrtü basotiatai manu pan y chabotiatai manu vinorrü, tonenti naqui cuatü ümoti carrticurrü uiti Tuparrü, itopiqui chütusiopü ümoti, ta tone nicütüpürrti Cristo. ³⁰Sane nauquiche aboma abarrüpecu bama sürümanama maunrocono y bama chücusüurupü, y sürümanama tücoiñoma. ³¹Tapürrtü barrtai nurria utacumatoe, chübacurrtaratipü Señor usaübu tacana arrüna sane. ³²Perorrtü bacheboti Tuparrü carrticurrü oemo, isamutenti sane tacana ñacuansomococorrti oemo, tapü carrticabo oñü ñana au infierno ichepe bama maquiataca icuqui na cürrü bama chicocoromatipü.

³³Sane nauquiche caüma masaruquitaquí, arrtü tocabo auba, tari aparrüpera ümo bama maquiataca, nauqui ichépe aubaca. ³⁴Artrü anati naqui cürüpüo, tari yarati au niporrti primero. Sane caüma champü carrticurrü uiti Tuparrü aume, arrtü apiyoberabacaño. Abe piquiataca nirrácüpucu aume, surapoi ausucarü arrtü yeca tanu.

Arrti Espíritu Santo bacheboti osüriacabo

12 ¹Caïma irranca rranuneca aume, masaruquitaiqui arrüba nosüriaca botorrio uiti Espíritu Santo. Irranca nauqui atusi nurria aume arrüna sane.

²Apaquionsaño iyo arrüna nausüboriqui tücañe, numo chapicococatiquipü Tuparrü. Tarucu naurrianca apanaun ümo masantuca, arrüba chüpuerurrüpü apanita. ³Suraboira nurria caïma ausucarü arrüna sane: Arttü anati Espíritu Santo auti taman ñoñünrrü chüpuerurrüpü nanti arrüna sane: “Tari paurramanati Jesús”. Y sane ito artti naqui chiyasuriurutitipü Espíritu Santo au nausasürri chüpuerurrüpü nantito sane: “Artti Jesús tonenti Señor”.

⁴Abe aruqui nanaiña nosüriaca botorrio oemo, pero anati tamantiatai naqui uiche aitorrimia oemo, ta artti Espíritu Santo. ⁵Ane ito aruqui nanaiña nubaserebiqui, pero anati tamantiatai Señor, naqui ümoche baserebiquia. ⁶Abe aruqui nanaiña arrüna isamutenti Tuparrü au nosüboriqui, pero nanaiña urriante uiti naqui tamantiatai Tuparrü. ⁷Torrio üriacaboti cadati taman uiti Espíritu Santo, nauqui bayura ümo namanaiña. ⁸Ümoti taman torrio uiti Espíritu Santo nauqui aipiati anitati aübu ñapanauncurrti. Ümoti quiatarrü torrio na aipiati anitati aübu nitusiquirrü ümoti. Manunecanati y bacheboti consejorrü uitiquito Espíritu Santo. ⁹Tamanti torrio ümoti nauqui aipiati oncotitü nurria ümoti Tuparrü. Artti quiatarrü torrio ümoti üriacaboti na acurati ümo bama maunrocono, uitiquito naqui Espíritu Santo. ¹⁰Uiti Espíritu Santo puerurrti taman aisamunenti milagorrü. Artti quiatarrü ipiacati anitati uiti Espíritu Santo y uraboiti ñapensacarrti Tuparrü. Artti quiatarrü tusio ümoti arttü tamanti ñoñünrrü manitanati uiti Espíritu Santo o uirrtiatoe, o uiti choborese. Tamanti ipiacati uiti Espíritu Santo anitati auqui piquiataca manitacaca, arrüba champü toncoiti. Artti quiatarrü torrio ümoti uiti Espíritu Santo nauqui puerurrti uraboiti auqui besüro manu manitacarrü uiti quiatarrü. ¹¹Nanaiña arrüna sane nosüriaca botorrio uiti Espíritu Santo isiu nirrancarrti ümo namanaiña.

Usaca tacana nicütüpürtti Cristo

¹²Arrübama icocoromati Jesús ichepecacama tacana nicütüpürtti taman ñoñünrrü. Arrüna nocütüpü abe sürümana parterrrü, abu tamantai nacarrü nocütüpü. ¹³Sane ito arroñü ichépe nurria nusaca. Champü nümoche arttü israelitarrü oñü o arttü chütüpü israelitarrü. Uyarrüpecu aboma bama mamosoca y bama abomantai. Numo osüriquia, artti Espíritu Santo iñanati oñü au manu tamantai cütüpürrü ichepe namanaiña bama maquiataca icocoromati Jesús; nanaiña oñü caïma tacana nicütüpürtti Cristo. Y nanaiña oñü cuati Espíritu Santo au nuyausasü.

¹⁴Arrüna nocütüpü abe sürümana parterrrü, champürtrü tamanti. ¹⁵Supiartrü manitanapü nopope, nantü sane: “Arrüñü champürtrü perteneceboñü ümo arrüna cütüpürrü cauta yaca, itopiqui chütüpü neheseñü”. ¹⁶Carürtrü nantü nuñumasu sane: “Arrüñü chiyacapü apü na cütüpürrü,

itopiqui chüitüpi sütorrüñü”. Abu aneantai apü nocütüpi, chüpuerurrüpi añanü peese. ¹⁷Arrtü nanaiñampü nocütüpi sütorrü, ¿causanempü nauqui oñoncoi? Arrtü nanaiñampü nocütüpi masurrü, ¿causanempü nauqui puerurrü manasa? ¹⁸Pero arrti Tuparrü iñaniontiño nanaiña arrüba parterrü apü nocütüpi isiu nirrancarri, nauqui ane taman nocütüpi urria. ¹⁹Chüpuerurrüpi ane nocütüpi, arrtü tamantai parterrü. ²⁰Arrüna nocütüpi abe sürümana peasomanca. Sane urriante taman nocütüpi oboi.

²¹Arrüna nosüto chüpuerurrüpi uraboi isucarü nuñe sane: “Champü nümohecü sobi”. Ni arrüna nutanu nantüpi ümo nopope sane: “Champü nümoche año sobi”. ²²Abe arrüba parterrü ocütüpi chübucusüurupü nurria, abu tonehio arrüba manrrü yupaserebiquirri oemo. ²³Abe ito arrüba parterrü ocütüpi champürrtü coñorrtai oemo, pero upucünuncatai yucuata. Abe ito arrüba parterrü uiche ocüsoca pario. Sane nauquiche manrrü bacuiraca yutacu. Butaburrio nurria osoi. ²⁴Arrüba piquiataca parterrü champü nümoche autaburri. Sane te uiti Tuparrü. Iñaniontiño arrüba parterrü apü nocütüpi, sane nauqui ane tamantai nocütüpi. Uiti te bucuasürü oemo manrrü arrüba parterrü champürrtü coñorrtai nurria. ²⁵Arrti Tuparrü chirranrtipü nauqui abe ba omeno peese omeanauqui ba parte nocütüpi. Rranrti nauqui apayura ñomeampatoe. ²⁶Arrtü ane taman parterrü nocütüpi taquisürü, auqui caüma enterurrü nocütüpi taquisürü ito. Arrtü taman parterrü yasutiü arrüna urria, nanaiña nocütüpi pucünuña.

²⁷Namanaiña arraño abaca tacana arrüna taman nicütüpirrti Cristo. Cadati taman anati tacana taman parterrü. ²⁸Arrti Tuparrü bacheboti oemo ubaserebiquibo, bama icocoromati Jesús. Primero aboma bama apostolerrü, auqui aboma bama manitana uiti Espiritu Santo. Auqui aboma bama manunecana. Auqui aboma bama masamunu milagrorrü y bama bacurara ümo bama maunrocono. Aboma ito bama bayurara ümo maquiataca y bama ipiacama üriaburuma. Aboma ito bama ipiacama anitama aruqui nanaiñantai manitacaca uiti Espiritu Santo. ²⁹Champürrtü torrio ümo cadati taman isiatai. Champürrtü namanaiña apostolerrüma, o manitanama uiti Espiritu Santo, o manunecanama. Champürrtü namanaiña ipiacama asamuma milagrorrü ³⁰y acurama ümo bama maunrocono. Champürrtü namanaiña ipiacama anitama auqui quiatarrü manitacarrü, ni namanaiñampü ipiacama uraboimia auqui besüro arrüna namatü auqui manio piquiataca manitacaca. ³¹Apapache niquiubu año causane nauqui aye aboi esauiti Tuparrü arrüba nüriacaca manrrü urria.

Pero caüma surapoi ausucarü quiatarrü, arrüna yarusürürrü yaserebiquirri.

Nucua oemoantoe

13 ¹Supiarrtü anati naqui ipiacati anitati aruqui nanaiñantai manitacaca, hasta ñanitacarrüma bama angelerrü, pero champürrtü cuasürüma ümoti bama maquiataca. Arrti anati tacana arrone tamera süuru, o tacana arrone praturrü tañeno ümo bullarrai. ²Supiarrtü anati naqui ipiacati anitati uiti Espiritu Santo, y isuputacati arrüna anecana y tusio ümoti nanaiña. Ipiacati oncotitü nurria

ümoti Tuparrü, hasta nauqui aucaüibupü yirituca uiti. Perorrüti chücuasürüpüma ümoti bama maquiataca, champü niyaserebiquirri arrümanu iyebo uiti. ³Supiarrüti anati naqui quiatarrü itorrimiatati nanaiña nenarrirrti ümo bama pobrerüti, y hasta itorrimianatiyü nauqui aiñonoconomati. Perorrüti chücuasürüpüma ümoti bama maquiataca, ümonatai nanaiña arrüna niyachücoiti.

⁴Arrtü cuasürüma oemo bama maquiataca, masamunaunca aübuma. Buenurrü oñü aübuma. Chüpesabopü oemo nenarrirrimia. Champürürtü ñentonaurrü oñü, ni vanurrü oñüpü. ⁵Arrtü cuasürüti oemo naqui quiatarrü, chuisamutempü arrüna chüsamianapü, o arrüna churriampü ümoti. Champürürtü ñocütünaunroñü. Chotüboriquiapatai. Chümaquioncapü oñü iyo arrüna nomünantü uiti quiatarrü.

⁶Chüpucünuncapü ui nomünantü, ta upucünunca ui arrüna urria yachücoiti quiatarrü. ⁷Arrtü cusürüti quiatarrü oemo, avantabo oñü y oñoncatito ümoti. Uipiaca ito barrüpera. Masamunaunca aübuti.

⁸Arrüna nucua oemoampatoe chüpuerurrüpü atacüru. Arrüna numanitaca uiti Espiritu Santo tiene que atacüru ñana. Arrüna numanitaca auqui piquiataca manitacaca tacürusu ñana. Caüma manitaca aübu numapanauncu uiti Tuparrü, pero arrüna sane ane nitacürurrü. ⁹Itopiqui caüma chütusiopü oemo nanaiña, y arrüna numanitaca champürürtü urria nurria. ¹⁰Pero barrüperaca ümo manu nanenese auqui ñana urriampae nusaca. Auqui caüma tacürusu arrüna churriampü nosüboriqui.

¹¹Arrüñü, numo yaürrüñünqui rranitaca y ñapensaca y ñonquisio tacanati taman ñaüma. Pero caüma ñoñünrrüñü. Chauqui tiñocoquio manio niñapensaca tacanati ñaüma. Ñapensaca caüma tacanati ñoñünrrü. ¹²Caüma chütusiopü nurria oemo. Tacanarrtü basacatü auqui nirrpecurrü, arrüna champürürtü urria nurria. Pero ñana besüratai nubasata ümoti Tuparrü, tacana arrüna nacarrtiatoe. Caüma chusuputacatipü nurria Tuparrü. Pero ñana usuputacati nurria, tacana ito arrti isuputarati oñü nurria.

¹³Nanaiña nubachücoi icu na cürrü tiene que atacüru ñana. Pero abe arrüba trerrü chübutacürusupü. Tonehio arrüba sane: Arrüna uicococati Tuparrü. Arrüna nubarrüperaca ümo arrüna urria uiti oemo. Y arrüna nucua ümoti Tuparrü y oemoampatoe. Arrüba trerrü chübutacürusupü. Arrüna nucua oemoampatoe, tone arrüna manrrü yarusürürrü omeanaqui ba trerrü.

Causane nauqui urria nubatrabacaca aübu nürriacaca botorrio oemo uiti Tuparrü

14 ¹Apiña nurria, nauqui acuasürüti quiatarrü aume. Apanquito pünanaquiti Tuparrü nauqui acheti aume arrüna abüriacabo. Apanqui pünanaquiti nauqui apipia apanita uiti Espiritu Santo, itopiqui tone manrrü baserebio aume. ²Arrti naqui manitana auqui quiatarrü manitacarrü manitanati ümoti Tuparrü, champürürtü ümo macrirrtianuca. Champüti naqui puerurrü aye uiti manu ñanitacarrti. Itopiqui manitanati uiti Espiritu Santo arrüna chütusiopü

ümo macrirrtianuca. ³Pero arrti naqui manitana auqui besüro uiti Espóritu Santo, ta ümo macrirrtianuca. Ui ñanítacarrti bayurarati ümoma, arucu tato ümoma y macuansomoconoti ümoma. ⁴Artri naqui manitana auqui quiatarrü manitacarrü manitanati ümotiatoe y bayurarati ümotiatoe. Tapü artri naqui manitanati auqui besüro bayurarati ümo namanaiña bama icocoromati Jesús.

⁵Irrancatai nauqui nanaiña arraña apiptaca apanita auqui piquiataca manitacaca uiti Espóritu Santo. Pero arrüna manitacarrü auqui besüro manrrü ane yaserebiquirrü ümo bama icocoromati Jesús pünanaqui ba piquiataca manitacaca. Arrüba piquiataca manitacaca solamenterrü paserebio ümo namanaiña, arrtü anati naqui ipiaca urapoi nurarrüma auqui besüro.

⁶Supia masaruquitaquí, arrtü yeca tanu aubesa y rranitaca aume auqui quiatarrü manitacarrü uiti Espóritu Santo. ¿Aensapü ane yaserebiquirri aume? No, champü. Tapürrtü rranitaca aume auqui besüro y surapoi ausucarü arrüna tusio iñemo uiti Tuparrü, o rranunecaca aume, auqui caüma ane niyaserebiquirri aume. ⁷Numanitaca ane tacana taman burrirri o tacana violín. Artri naqui masümununu tiene que aipiati nurria. Si no, chütusiopü isane sonirri arrüna masümununuti. ⁸Isiatái pasabo arrtü ane guerra, bahiquirri. Arrtü puuru cornetarrü acomoraboma masortaboca ümo bahiquirri. Perortü chüpuurupü nurria, champüti naqui acomorabo. ⁹Isiatái napanitaca. Arrtü chübesüropü nurria, champüti iyebo uiti, ümonatai napanitaca. ¹⁰Icu na cürrü abe mantucubupatai manitacaca y cada taman ane yaserebiquirri ümo bama ipiaca anitanema y ümo bama oncoimia. ¹¹Tapürrtü chiyebopü sobi ñanítacarrti quiatarrü, yaca caüma ümoti tacanati extranjerurrü y artri iñemo isiatái. ¹²Arraña tarucu naurrianca na atorri aume uiti Espóritu Santo abüriacabo. Pero apiña nurria, nauqui atorri aume arrüba nüriacaca uiche manrrü puerurrü apaserebi ümo bama icocoromati Jesús.

¹³Sane nauquiche artri naqui manitanati auqui quiatarrü manitacarrü tari ñanquirati pünanaquiti Tuparrü ipiacaboti nauqui puerurrüto uraboiti auqui besüro arrüna nanti auqui manu quiatarrü manitacarrü. ¹⁴Artri naqui manitanati auqui quiatarrü manitacarrü meaboti ümoti Tuparrü uiti Espóritu Santo, pero champürrtü meaboti ui ñapensacarrtiatoe, ta uiti Espóritu Santo. ¹⁵¿Causane caüma osoi? Oñeana te uiti Espóritu Santo auqui quiatarrü manitacarrü, arrüna chentienderrüpi oñü. Pero oñeana ito auqui besüro, nauqui entienderrü oñü ümo. Puerurrü macanta uiti Espóritu Santo, pero puerurrü ito macanta aübu nanaiña numapensaca. ¹⁶Tapürrtü anati naqui iñanaunuti Tuparrü auqui quiatarrü manitacarrü uiti Espóritu Santo, arrübama maquiataca chentienderrüpüma neancarrti, y chüperurrüpi achampienicama ichepeti, itopiqui chütusiopü ümoma isane urapoiti. ¹⁷Arrümanu neancarrti urriampae ümoti Tuparrü, machampiencanati ümoti. Pero arrübama maquiataca champü yaserebiquirri ümoma.

¹⁸Arrüñü rranitaca manrrü amopünanaqui auqui quiatarrü manitacarrü uiti Espóritu Santo. Ñachampienacaca ümoti Tuparrü itacu arrüna sane torrio iñemo uiti. ¹⁹Pero eana bama icocoromati Jesús

manrrü urria iñemo rranita chimiantai auqui nurarrümantoe, nauqui puerurrü aye uimia. Arrtü rranitaca auqui quiatarrü manitacarrü, panaca abaiturrü, pero arrüma chüpuerurrüpü aye uimia, chentienderrüpüma.

²⁰Masaruquитайqui, tapü apapensaca tacana mañaümanca. Apaensa tacana mayarusürüca mañoñunca. Au quiatarrü piaracarrü, abu urriantai nabaca tacana masiomanca, itopiqui arrüma chabaeturrüpü nitüborirrimia. Apisamuse ito sane. ²¹Ane te corobo nurarri Tuparrü sane:

Rranitaca ümo na genterrü Israel auqui quiatarrü manitacaca turuqui bama extranjerurrü.

Itopiqui arrüma chirranrrüpüma acoconauma iñemo, nanti Tuparrü. Chirranrrüpüma onsaperioma nisura.

²²Sane nauquiche arrüna nuipiaca manita auqui quiatarrü manitacarrü baserebio tacana señarrü ümo bama chicocoromatipü Tuparrü, champürrtü ümo bama icocoromati. Tapü arrüna nuipiaca manita auqui besüro uiti Espíritu Santo, baserebio tacana señarrü ümo bama icocoromati Tuparrü, champürrtü ümo bama chicocoromatipü. ²³Supiarrtü apiyoberabacaño nauqui apanaun ümoti Tuparrü. Nanaiña arraña apanitaca auqui piquiataca manitacaca. Auqui iñataimia aubesa bama chicocoromatipü Tuparrü, y bama chütusioöpü ümoma. Oncoimia arrüna sane napanitaca. Arrüma caüma namatü que locorraño, itopiqui chentienderrüpüma. ²⁴Tapürrtü apanitaca auqui besüro uiti Espíritu Santo, auqui caüma arrübama chicocoromatipü o bama chütusioöpü ümoma oncoimia nabura y iyebo uimia, y tusio ümoma aboi que ane nipünatema, y tusio ito ta bacurrtarati ñana Tuparrü aübuma. ²⁵Auqui butusio arrüba anecanatai ñapensacarrüma au nitusirrimia. Bachesioyoma nauqui anauma ümoti Tuparrü y namatü: “Ñemanauntu, arrti Tuparrü anati abarrüpecu”.

Nüriacarrü ümo bama icocoromati Tuparrü

²⁶¿Causane aboi caüma, masaruquитайqui, arrtü apiyoberabacaño? Bueno, tamanti macantarati ümoti Tuparrü. Arrti quiatarrü manunecanati nurarri. Arrti quiatarrü urapoiti arrüna tusio ümoti uiti Tuparrü. Arrti quiatarrü manitanati baeta auqui quiatarrü manitacarrü, y arrti quiatarrü urapoiti auqui besüro arrüna nanti maniqui. Nanaiña arrüna sane napachüicoi apisamuse nauqui apayura ümoti quiatarrü. ²⁷Arrtü aboma bama manitana auqui piquiataca manitacaca, tari ñanitanama torrüma o trerrüma. Tamanti urapoiti auqui besüro arrüna manitanama. ²⁸Tapürrtü champüti naqui ipiaca uraboi auqui besüro, tapü manitanama bama auqui quiatarrü manitacarrü. Mejor tari ñanitanama ümoti Tuparrü y ümomantoe auqui manu quiatarrü manitacarrü. ²⁹Tari sane ito ui bama manitanama auqui besüro uiti Espíritu Santo. Tari ñanitanama torrüma o trerrüma. Arrübama maquiataca tari onsapeoma y tari urapoimia arrtü urria ümoma, y arrtü ñemanauncurratoe uiti Espíritu Santo. ³⁰Rrepente anati naqui tümonso, y arrti Tuparrü bacheboti ñapensacaboti au nitusirrti au manu rratorrü. Auqui caüma tari etayoiti naqui manitana y arrti naqui quiatarrü caüma tari

ñatoconati anitai. ³¹Namanaiña arraño puerurrü apanita uiti Espiritu Santo, pero taiquianati taman. Sane nauquiche ane manunecarrü y macuansomococorrü ümo namanaiña. ³²Arrübama ipiacama anitama uiti Espiritu Santo puerurrüpi anitama y etaiyoimia isiu nirrancarrüma. ³³Arri Bae Tuparrü rranrti te nauqui urria nusaca y chirranrtipü ümo ausüratai. Tari tamantiatai naqui manitanabo.

³⁴Artrü apiyoberabacaño, tari ometayoi ba paüca, tapü panitana. Sane bacüpucurrü ümo namanaiña bama icocoromati Jesús au nanaiñantai. Tari pacoconaun ümo bama ane nüriacarrüma ñome. Sane ito nantü icu manu corobo nüriacarrü. ³⁵Artrü murrianrrü atusi ñome, tari panquiriora pünanaqui bama ñopiquianio tato au nioyoporrü. Itopiqui champürrtü coñotü ümo paürrü anita fuerte au reunión. ³⁶¿Taqui churriampü aume arrüba bacüpucuca? Apaquionsaño, arrüna nurarri Tuparrü champürrtü cusürübo acamanu ameanu, y champürrtü arrañoantai apasutiu.

³⁷Arraño napaquionco que manitanati Tuparrü abuturuqui, y que anati Espiritu Santo au nabausasü. Urria arrüna sane, pero apaquionsaño que arrüna sucanañü, tone yacüpucurrü Tuparrü. ³⁸Arri naqui chicocotatipü arrüna sane, tapü apicocota ito nurarri.

³⁹Bueno bama masaruquitaiqui, tone niranunecaca aume: Apiña nurria nauqui apiapia apanita uiti Espiritu Santo. Tari chebatai aboi anitama auqui piquiataca manitacaca. Pero tari anati quiatarrü naqui uiche uraboiti auqui besüro. ⁴⁰Tari apisamuse nanaiña aübu nacomoracarrü y coñorrtai.

Süboricoti tato Cristo

15 ¹Masaruquitaiqui, caüma irranca nauqui apaquioncaño iyo arrüna urriampae manitacarrü, arrüna surapoi aucutanu ausucari. Apasutiu y apicococati nurria Jesús. ²Ui arrüna urria manitacarrü autaesübuca eanaqui nomünantü. Artrü apicocota enterurrü nausüboriqui, urria nabaca. Tapürrtü apiñocota, ümonatai napacoconauncu ümoti Jesús.

³Sucanañü aume aucutanu arrüna ñoncoi y torrio iñemo uiti Tuparrü. Primero surapoi ausucari arrüna sane: Arri Cristo coiñoti nauqui aurrimiaca tato nomünantü osoi. Sane ito nantü icu Nicorrrü, arrüna tücorobocai tücañe. ⁴Auqui iñanamati cütü y pürücü trerrü naneneca süboricoti tato, tacana arrüna nantü icu Nicorrrü. ⁵Itusiancanatiyü isucarüti Pedro y auqui isucarü namanaiña bama maquiataca ñanunecasarrü, bama apostolerrü. ⁶Auqui itusiancanatiyü isucarüti bama quiniento o manrrü nubiqui macrirrtianuca, bama icocoromati. Arrüma caümainqui aboma süboricomainqui. Pero uturuquimia aboma bama tücoiño. ⁷Auqui itusiancanatiyü isucarüti Jacobo y auqui isucarü namanaiña bama apostolerrü tatito. ⁸Au nitaciurrrü itusiancanatiyü isucarüñü ito, abu chauqui tübupasao sürümana añoca. ⁹Arrüñü champü isane niyaca eana bama apostolerrü, itopiqui tücañe anancañü yacheca itaquisürücüiboma bama icocoromati Tuparrü. Sane nauquiche chiñoñopütü nauqui namatü iñemo “apóstol”. ¹⁰Pero arri Tuparrü pucürusuti ichacuñü. Itasurutiñü, nauqui apóstol ñü ümoti Cristo.

Champürttö ümonatai manu yatasucurtti ñemo. Ta arrüñü manrrü urriante sobi pünanaqui namanaiña bama maquiataca. Abu champürttö sobiatoe rratrabaca, ta artti Tuparrü naqui batrabacarati saibuñü, itopiqui isuasirtica ümoti. ¹¹ Champü nümoche sobi arttö arrüñü surapoi manrrü nurarri Tuparrü, o arttö urapoi mia bama maquiataca. Pero arrüna suburapoi ausucartü, tone arrüna apicocota.

Nosüboriqui tato ñana

¹² Así que tone arrüna supanunecaca aume: Artti Cristo süboricoti tato eanaqui bama macoiñoca. ¿Causanempü aboma bama taha abarrüpecu, namatü que arrübama tücoiño chüpuerurrüpü asüobrimia tato? ¹³ Arttö champü süboriquirripü tato, entonces chüpuerurrüpü asüboriti tato Cristo tücañe. ¹⁴ Tapürttö ñemanauntupü chisüboricotipü tato Cristo, auqui cüma ümonataipü arrüna supanunecaca, y ümonataito arrüna napacoconauncu. ¹⁵ Arttö ñemanauntupü arrüna sane, arrüsomü mañapancapü somü ümoti Tuparrü, itopiqui suburapoi que artti Tuparrü isümoniancanatiti tato Cristo. ¹⁶ Itopiqui arttö ñemanauntupü arrüna chüpuerurrüpü asüborimia tato bama coiño, arrtitopü Cristo chüsüboricotipü tato tücañe. ¹⁷ Arttö sanempü, arrüna napacoconauncu ümonataipito, y chümorrimiacanapü tato nomünantü aboi. ¹⁸ Y arrübama icocoromati Jesús, bama tücoiñoma, ensoropü nausüpürrüma, arttö chüñemanauntupü arrüna supanunecaca. ¹⁹ Arttö sane, oñocatü ümoti Cristo aunantai icu na cürü, pero champü nosüboriqui tato ñana. Manrrü ümonataipü nosüboriqui pünanaqui namanaiña macirrtianuca icu na cürü.

²⁰ Abu ñemanauncurratoe, artti Cristo süboricoti tato eanaqui macoiñoca. Uirri tusio oemo que arrübama ito maquiataca coiño tiene que asüborimia tato ñana. ²¹ Arrüna concorrü ane icu na cürü itopiquiti maniqui tamantiatai ñoñünrrü tücañe, naqui Adán. Isiatai uiti naqui quiatarrü tamantiatai ñoñünrrü süboricoma tato bama coiño, ta uiti Cristo. ²² Namanaiña macirrtianuca icu na cürü aboma auqui nesarri familiarrü Adán. Sane nauquiche namanaiña coiñoma. Pero namanaiña bama icocoromati Cristo süboricoma tato eanaqui bama macoiñoca.

²³ Sane niyücürü: Artti Cristo cusürüboti asüboriti tato. Arttö cuati tato ñana auqui napese, tocabo ümo bama icocoromati asüborimia tato. ²⁴ Auqui caüma cuatü ñapacümuncuturtti Tuparrü. Uiti Cristo caüma omiñarrio nanaiña piquiataca nüriacaca icu na cürü, y tacürusuma namanaiña bama tüborico ümoti. Auqui itorrimiatati nüriacarri ümoti Bae Tuparrü. Auqui caüma üriabucati Tuparrü üno namanaiña. ²⁵ Itopiqui artti Cristo tiene que üriaburuti cheperri macananati ümo namanaiña bama nesarri enemigorri. ²⁶ Arrüna tacürurri enemigorri ümoti, tone concorrü. Uiti Cristo caüma tacürusu concorrü. ²⁷ Ane te corobo que artti Tuparrü iñatati nanaiña iquiana nüriacarri Cristo. Abu arrtiatoe Bae Tuparrü champürttö anati iquiana nüriacarri Cristo, itopiqui uiti te torrio üriacaboti Cristo. ²⁸ Sane arttö torrio nanaiña mecuti Cristo uiti Tuparrü, artti iñanatiyü ito iquiana nüriacarri Tuparrü. Auqui caüma ane yarusürürrü nüriacarri Tuparrü ümo nanaiña.

²⁹Apapensa baeta ümo bama ürioma itacu bama tücoiño. ¿Causane aisamunema arrüna sane? Arrtü ñemanauntupü chüsüboricopüma tato bama coiño, ümonatai arrüna nüriquirrimia itacuma.

³⁰Apapensa baeta iyo nisüboriqui, masaruquitaqui. Naneneca ichaquisürüca, y tüsaipü isonca. ¿Acasopü ümonatai? ³¹Surapoi arrüna sane ausucari, masaruquitaqui, au nürirrti Señor Jesucristo, itopiqui tarucu nipucünuncu aucuata. Ñemanauntu te, naneneca rranrrüma aitabairomañi. ³²Au Efeso tarucapae nitübori genterrü iñemo. Aboma tacana nuitümüca botüborico. ¿Pero isanempito yaserebiqui nanaiña arrüna nichaquisürücü, arrtü ñemanauntupü chüsüboricopüma tato bama coiño? Arrtü sanempü, mejor usuraboira tacana bama maquiataca sane: “Ubara, uchara, itopiqui tubaca oconca”. ³³No, tapü sane numapensaca. Amasasai nurria, tapü apatachemacaca aumeampatoe, masaruquitaqui. Apaquionsaño iyo arrümanu manitacarrü sane: “Mameso numapanauncu uiti ucumpañeru malorrü”.

³⁴Apapensa nurria tatito y tapü apisamute nomünantü. Canapae taha abarrüpecu aboma bama chisuputaramatipü Tuparrü. Sucanañü aume arrüna sane, nauqui ane naucüso sobi, nauqui apicoñoco nausüboriqui.

Arrüna nocütüpü, arrtü osüboriquia tato

³⁵Rrepente aboma bama ñanquitio sane: “¿Causane ñana arrtü süboricoma tato bama coiño? ¿Isanempü naca nicütüppürrüma?” ³⁶Bueno, ¿causanempü anquirioma sane? ¿Taqui chütusiopü ümoma? Supiarrtü mancütuca taman niyoma. Arrümanu niyorrü tiene que aüro cütü, nauqui puerurrü ubai plantama. ³⁷Arrüna süro cütü chitonempü manu plantama, ta niyomantai. Supiarrtü süro cütü niyo trigo o quiatarrü nacarrü. ³⁸Auqui arrti Bae Tuparrü isamutenti isiu nirrancarrti. Nanaiña niyoca bacheboti yocütüpübo isiu nacarratoe. ³⁹Abe te aruqui nanaiñantai bosüborico. Arrüna nocütüpü champürrtü isiu tacana niyocütüpü numuquianca. Arrüna niyocütüpü nutaumanca quiatarrü. Niyocütüpü nopiococa quiatarrü. ⁴⁰Abe ito arrüba cütüpüca au napese, chisiupü tacana ba cütüpüca icu na cürrü. Arrüba auqui napese ane niñocoñooporü, pero chisiupü niñocoñoopo ba icu na cürrü. ⁴¹Arrüba cütüpüca icuqui napese champürrtü isiatu niyocütüpü nanaiña. Arrüna surrü chisiupü tacana nanentaca pama. Y arrüna nanentaca pama chisiupü tacana nanentaca ba norrtoñeca. Y nanaiña ba nostoñeca ane numanentacarratoe.

⁴²¿Carü caüma nocütüpü, arrtü osüboriquia tato? Arrüna cürrü nocütüpü süro cütü. Chüruraupü, poreo. Pero arrtü osüboriquia tato, ane nocütüpü arrüna chüporeopü y chüpuerurrüpu acon tato. ⁴³Arrüna nicuntu bama coiño chücusiurupü, ünantatai. Pero arrtü süboricoma tato, ane nicütüppürrüma cusüuru y coñorrtai nacarrüma. ⁴⁴Süro cütü arrüna cürrü cocütüpü. Pero arrtü osüboriquia tato campiabo naca nocütüpü, tacana nicütüppürrüma bama au napese. Abe te arrüba cütüpüca ümo na cürrü y abe ito arrüba cütüpüca ümo napese. ⁴⁵Ane te corobo que arrti maniqui primer ñoñünrrü torrio

isüboriquiboti auna icu na cürrü aübu cürrü nicütüpürrti. Pero artti Cristo tonenti naqui anati caüma au napese, uiti torrio oemo osüboriquibo. ⁴⁶Pero primero osüboriquia icu na cürrü aübu cürrü nocütüpü. Ñana tiene que atorri oemo manu quiatarrü ocütüpübo, arrüna urria y uiche puerurrü ariorrü oñü au napese. ⁴⁷Artri naqui primer ñoñünrrü Adán urriancati tücañe ui cürrü. Anatito naqui quiatarrü ñoñünrrü chisiupü nacarrti, itopiqui cuati auqui napese. Tonenti Cristo. ⁴⁸Arrüba nicütüpü bama macirrtianuca icu na cürrü tacana nicütüpürrti Adán. Pero nananaiña bama icocoromati Cristo, naqui auqui napese, torrio ñana icütüpüboma isiatai tacana nicütüpürrti Cristo, arrüba urria ümo napese. ⁴⁹Caüma usaca tacanati naqui ñoñünrrü urriancati ui cürrü. Pero ñana iyebo osoi tacanati naqui quiatarrü ñoñünrrü auqui napese.

Niyequirrti tato Cristo

⁵⁰Suraboira nurria arrüna sane ausucarü, masaruquитайqui: Arroñü aübu na cürrü nocütüpü chüpuerurrüpü aye osoi au napese auna cauta ane nüriacarrti Tuparrü, itopiqui chüruraupü nocütüpü, chüpuerurrüpü asübori ümo para siemperrü. ⁵¹⁻⁵²Suraboira ausucarü arrüna chütusiopü tücañe. Champürrtü namanaiña oñü oconca ñana. Arrtü rabotü manu tacürurrü nipucu cornetarrü uiti ángel, campiabo naca nocütüpü. Arrüna niquiampiaca urriante apuraurrü, au nubasacuacatai. Arrtü puuru manu cornetarrü, süboricoma tato bama coño. Chanantopü acoma tato. Y arroñü bama osüboriquiaiqui icu na cürrü campiabo nusaca. ⁵³Itopiqui caüma ane cürrü nocütüpü, arrüna puerurrü acon. Arrüna nocütüpü tiene que acampia, sane nauqui ane nuevurrü nocütüpü arrüna chüpuerurrüpü acon y chüpuerurrüpü apore; süborico ümo para siemperrü. ⁵⁴Arrtü pasao arrüna sane, auqui caüma cocono arrüna nantü icu Nicororrü sane:

Tacürusu concorrü.

Chauqui tümacanate osüboriquibo.

⁵⁵Chanantopü tato ocon.

Tacürusu nüriaca concorrü oemo.

⁵⁶Arroñü oconca itopiqui na nomünantü osoi. Y arrüna nomünantü osoi tusio, itopiqui ane corobo nüriacarrü. ⁵⁷Machampiencana ümoti Tuparrü, itopiqui bacheboti osüboriquibo auqui nacarrti Señor Jesucristo.

⁵⁸Sane nauquiche, masaruquитайqui, apiña nurria, tapü apatacheca napacoconauncu ümoti Tuparrü. Apiña nurria napatrabacaca ümoti Señor, itopiqui tusio te aume, que champürrtü ümonatai napaserebiqui ümoti.

Macumanatarrü ümo bama icocoromati Jesús au Jerusalén

16 ¹Suraboira ito ausucarü arrüna numacumanata monirri ümo bama icocoromati Jesús au Jerusalén. Apisamuse tacana arrüna nirranunecaca ümo bama icocoromati Jesús au manu provinciarrü Galacia. ²Cadati taman ameanaquí tari aiñahübuti nimonirrti taiquiana chimiantai

tomincoca isiu arrüna puerurrü, o isiu nisubaiqui arrüna macananati. Sane nauqui ane aboi ümorrtü ññatai tanu aubesa. ³Arrtü ññatai tanu aubesa tiene que rracüpu au Jerusalén ümo bama mañoñünca ameanauqui, bama amoncatü nurria ümoma. Aübuma icüputa quichonimiacarrü y arrümanu macumanatarrü monirri. Uimia caüma torrio ümo bama au Jerusalén. ⁴Perorrtü urria ññemo, yecatito y arrüma caüma süromati ichepeñü.

Mapensarati Pablo ümo nesarrti viajerrü

⁵⁻⁶Auqui na irranca yapasa auqui manu cürrü Macedonia, nauqui yapasea baeta ümo bama icocoromati Jesús taha. Auqui taha yero tanu aubesa au Corinto. Irranca yasiquia taha abarrüpecu, arrtü puerurrü enterurrü manio panca rrimianene. Auqui caüma puerurrü apayura ññemo ümo niyesa viajerrü, arrtü yecatito abarrüpecuqui. ⁷Chirrancapü unrratorrtai niyapasea abarrüpecu. Ta irranca yasiquia abarrüpecu ññoma süürümana naneneca, arrtü sane nirrancarrti Señor.

⁸Irranca yasiquia auna pueblurrü Efeso cheperrtü tiññatai pierrta Pentecostés. ⁹Itopiqui auna Efeso ane chama rratrabacabo, nauqui puerurrü suraboi nurarrti Tuparrü y rranuneca. Pero aboma ito süürümanama bama churriampü ümoma. Manitanama churriampü ññemo itopiqui nirratrabacaca.

¹⁰Arrtü ññataiti Timoteo taha abarrüpecu, apasusiusurrti nurria, tapü birrubuti amünana, itopiqui arrtito baserebioti ümoti Señor, tacanañü. ¹¹Tapü apuncati. Apayura ito ichepeti, arrtü pasaoti auquimanu aubesaqui au nesarrti viajerrü tauna tato yesañü. Arrüñü ichepe bama maquiataca masaruquитайqui suparrüperaca te cümenuti. ¹²Anatito auna naqui usaruqui Apolos. Nantarrtai irrancapü icüpuruti tanu aubesa, nauqui aerotitü ichepe bama maquiataca usaruquитайqui. Pero chirranrrtipü aeroti tanu caüma. Arrtü ane tiemporrü ümoti, auqui süroti tanu.

Ññauioncorrti Pablo ümoma

¹³Amasasai nurria, tapü apiñocota napacoconauncu ümoti Tuparrü. Apiña nurria tacanati ññöñünrrü, tapü apatacheca isiuquiti Cristo.

¹⁴Nanaiña napachücoi apisamuse aübu naucua aumeampatöe.

¹⁵Apisuputacati naqui Estéfnas y nanaiña nesarrti familiarrü. Arrüma cusürüboma aicocoromati Jesús au manu cürrü Grecia. Urriampae yaserebiquirrimia ümo nanaiña bama maquiataca icocoromati Jesús.

¹⁶Rranquiquia amopünanaqui, masaruquитайqui, nauqui apacoconaun ümo bama sane yaserebiquirrimia y ümo bama batrabacara sane ümoti Tuparrü. ¹⁷Ipucünunca nurria uiti Estéfnas y uiti Fortunato y uiti Acaico, bama aboma auna ichepeñü. Arrüma matoconoma auna yesañü abitobo, bayurarama ññemo. Isamutema arrüna chüpuerurrüpü apisanune, itopiqui abaca iche rropünanaquiñü. ¹⁸Uimia arucu tato ññemo, tacana ito arraño. Apaquionsaño nurria ümo bama mañoñünca.

¹⁹Arrübama icocoromati Jesús au na provinciarrü Asia ñaquioncorrüma tanu aume. Ñaquioncorrti Aquila y Priscila tanu aume y ñaquioncorrüma namanaiña bama iyoberabaramacü au niporrüma au nürirrti Jesús.

²⁰Apasusiu ñaquioncorrüma namanaiña bama usaruquитайqui auna.

Apanqui nurria aübu napatañumequi aumeampatoe au nürirrti Señor Jesús.

²¹Arrüñü Pablo rracüpuca tanu aume nirraquionco. Iconomota icu na quichonimiacarrü nisüri ui niñeantoe. ²²Arrti naqui chücuasürütüpü Señor Jesucristo ümoti, tari paurramanati. ¡Ariacu te, Señor!

²³Tari icunusüancanati año Señor Jesús. ²⁴Namanaiña arraño aucuasürüca iñemo au nürirrti Cristo Jesús. Amén.